

四庫全書

子部

欽定四庫全書

格致鏡原卷六十七

大學士陳元龍撰

木類

四

異木

山海經洞野之山有樹青葉赤華名若木生崑崙山附
西極其花光下照地神人之丘有木焉其狀如牛引之
有皮若纓黃蛇其葉如羅其實如纍其木若藟其名曰
建木日中無影百仞無枝上有九櫨

音竹枝
同曲也

下有九枸

根盤錯也

其實如麻

似麻子也

其葉如芒

芒木似棠梨

大皞爰過

言庖犧子

此經

黃帝所爲

言治護之也

淮南子建木在都廣衆帝所

自上下日中無影呼而無響蓋天地之中也

都廣南方山名也衆

帝從此山上天還下故曰上下日中時日直人無有晷故曰天地之中

扶木在揚州日之

所贖

照也音沸

拾遺記祈淪國有壽木之林一樹千尋日

月爲之隱蔽若經憇此木下皆不死不病瀛州有影木

日中視之則一葉百影花有光夜如列星萬年一實其

大如瓜 山海經密山上多丹木圓葉而赤莖黃花實

如飴食之不饑玉膏灌丹木丹木五歲五色乃清五味
乃馨 神異經東南荒中有柳木焉其枝喬直上二百
歲葉落而生花花影如甘瓜復二百歲一落盡而生萼
下生子三歲而成熟成熟之後不長不減子形如寒瓜
此實不取萬世如故若取下子而畱萼萼復生子如初
瓢甘美如蜜食之令人身澤不可過三升令人冥醉半
日乃醒一名無葉一名倚驕一名綺縞 拾遺記燧明
之國不識晝夜土有燧木後世聖人游於日月之外以

食救物至於南垂觀此燧木有鳥類鶚啄其枝則火出
取以鑽火號燧人氏在庖犧氏之前蓋火山國也 吳
越春秋越王得神木一雙大二十圍長五十尋陽爲文
梓陰爲梗桺巧工施校制以規繩雕治圓轉刻削磨礱
分以丹青錯畫文業婪以白璧鏤以黃金狀類龍蛇文
彩生光乃使大夫種獻之於吳王 物類相感志射木
根如生人長七尺刻之有血以其血塗足下可以步行
水上不沒以塗鼻上入水則水爲之開可以止住泉底

塗身則隱形欲見則拭去之 洞冥記武帝常見彗星

東方朔折指星木授帝帝以木指彗星則沒 物類相

感志青榎木出外國漢武得之其木有膏如淳漆削置
器中以蠟和之塗布然照數里之光 洞冥記東方朔

從西邨汗國歸得風聲木十枝獻帝長九尺大如指此
木臨因桓之水禹貢所謂因桓是也其源出甘波樹上

有紫燕黃鵠集其間實如油麻風吹枝如玉聲因以爲
名有武事則如金革之響有文事則如琴瑟之響上以

枝遍賜羣臣臣有凶者枝則汗出臣有死者枝則折昔
老聃在周世七百年枝未汗偃佺生於堯時三千歲枝
未折帝乃以枝問朔朔曰臣已見枝三過枯死而復生
豈汗折而已哉里語曰年未半枝未汗此木五千年一
汗萬歲不枯縉雲之世生於阿閣間也 杜陽編李輔
國有鳳首木高一尺雕刻鸞鳳之狀形枯槁毛羽脫落
不甚盡雖凝寒之時置諸高堂大厦之中而和煦之氣
如二三月故別名爲常春木縱烈火焚之終不焦黑焉

酉陽雜俎倒生木依山生根在上有人觸則葉翕人
去則葉舒出東海 洞冥記明天發日香生香池寒國
地有發日樹言日從雲出雲來掩日風吹樹枝拂雲開
日光也亦名開日樹 括地圖龍池之山四方高中央
有池方七百里羣龍居之多五花樹羣龍食之 酉陽
雜俎乾陀國頭河岸有繫白象樹花葉似棗柔冬方熟
相傳此樹滅佛法亦滅 釋典帝釋殿前員生樹梵語
波利質多樹高一百繇旬枝葉覆五百繇旬寶花開時

天界自然嚴飾妙好能逆風香諸每天子夏月於樹下
宴息法華經謂之天樹王 洪容齋隨筆行行相植莖
莖相望枝枝相准葉葉相向華華相順實實相當此無
量壽經所言天宮寶樹非塵世所有也 博物志三珠

樹生赤水上其樹如柏葉皆爲珠 彙苑詳註海商下

舉者言有珠子樹其珠生於蚌中蚌生於樹上綴著不
解樹乃生於石石在海底蟠戶鮫人涸於水中鑿石得
樹其樹如楊柳枝良可愛 淮南子禹以息土填洪水

以爲名山掘崑崙虛以爲下地

一作池

中有增城九重上

有木禾珠樹玉樹璇樹不死樹在其西沙棠琅玕在其東絳樹在其南瑤樹在其北北門開以納不周之風

述異記影娥池北作鳴禽之苑有生金樹破之皮間有屑如金而色青亦名青金樹 洞冥記元光元年起壽

福靈壇濶百步四周起銅梁銀堤水上列種垂龍之木木似青梧有朱露色如丹汁灑其葉落地皆成珠其枝似龍體倒垂亦曰傾紅樹亦曰珠枝樹 西京雜記積

草池中有珊瑚樹高一丈二尺一本三柯上有四百六十二條是南越王趙佗所獻號爲烽火樹至夜光景常欲然 彙苑詳註光武時南海獻婦人珊瑚樹帝命植於殿前謂之女珊瑚一旦柯葉甚茂至靈帝時樹死

續仙傳謝玄卿遇神仙見丹柯碧葉微風時叩五音相節云瑯玕樹也 莊子逸篇鳳凰所居積石千里河水出下天爲生食其樹名瓊枝高百仞以琳琅爲實天又爲生離珠一人三頭遁卧迭起以伺琅玕 莊子楚之

南有冥靈者以五百歲爲春五百歲爲秋 神異經南
方大荒有樹名如何三百歲作花三百歲作實有核如
棗子長五寸金刀割則飴竹刀割則苦木刀割則酸蘆
刀割則辛食之則得仙 湖廣通志施州慢水寨有木
名普舍樹普舍華言風流也昔覃氏祖於東門關伐一
異木隨流至地名那車復生根而活四時開百種花覃
氏子孫歌舞其下花乃自落取而簪之他姓人往歌花
不復落尤爲異也 物類相感志尸利沙樹生西域其

果難生若昂星時果則生 真誥仙道有絳樹青實服
之身化爲金有赤樹白子服之身化爲玉 西京雜記
終南山多合離樹葉似江離而紅綠相雜莖皆紫色氣
如羅勒其樹直上百尺無枝上結藂條狀如車蓋一青
一丹斑駁如錦繡長安謂之丹青樹亦云華蓋樹 述
異記辰州嵩溪有丹青樹上有五色葉圓如華蓋俗謂
之五采樹 山海經開明北有文玉樹一樹有五彩太
極之山有采華樹服之則通萬國之言 杜詩註額

同額

常樹無皮出肅慎氏之國聖人在位則木生皮可爲衣
其國朝貢中國成王時一生之

其俗無衣聖帝代立
則此木皮可衣也

物類相感志水仙樹腹中仙漿有飲者七日醉但令人
翻轉過七日免爛即得壽五百歲 南史頓遜國有酒

樹似安石榴採花汁停甕中數日即成酒 十州記聚

窟洲海中申未地上有大樹與楓木相似而花葉香聞
數百里名爲返魂樹於玉釜中煮取汁如黑飴名之爲
返生香香氣聞數百里死屍在地聞氣仍活 述異記

返魂樹伐其根心於玉釜中煮取汁又熬之令可丸名
曰驚精香或曰震靈丸或名返生香或名卻死香 博
物志員丘山有不死樹食之乃壽 洞冥記影娥池有
女香樹細枝葉婦人帶之香終身不歇 物類相感志
阿叔迦樹生西域若女人摩觸花爲之出不然則否
採蘭雜志頓遜國有淫樹花如牡丹而香種有雌雄必
二種竝種乃生花去根尺餘有男女陰形以別雌雄種
必相去不遠二形晝開夜合故又以夜合爲名又謂之

有情樹若各自種則無花也 廣博物志海中有銀山

生樹名女樹天明時皆生嬰兒日出能行至食時皆成
少年日中成壯年日晚老年日没死日出復然 文獻

通考大食國海中石上有樹枝赤葉青上生小兒長六
七寸見人則笑摘入手中即乾而黑名嬰彌樹 庶物

異名疏白虎通曰賢不肖位不相踰則平路生於庭平
路樹名也官位得其人則生失其人則死瑞應圖曰平
路如益生於庭似四方之政王者不私人以官則四方

之政平若東方政不平則西低北方政不平則南低西方政不平則東低南方政不平則北低四方政不平其根若絲一曰兩平 拾遺記燕昭王種長春樹葉如蓮花樹身似桂其花隨四時之色春生碧花春盡則落夏生紅花夏末則凋秋生白花秋殘則萎冬生紫花遇雪則謝 宋書孫皓天璽中臨海郡吏伍曜在海水際得石樹高三尺餘枝葉紫色詰曲靡麗有光彩 洽聞記唐永昌中台州司馬孟詵奏臨海水下馮義得石連理

樹三株皆白石天成 山海經放臯之山有木焉其葉
如槐黃華而赤實其名曰蒙木食之不惑大室之中山
有木焉其狀如楊而赤理其名曰栳服之不如東始之
山有木焉其狀如楊而赤理其汁如血不實其名曰芑
可以服馬以汁塗之則馬調良浮戲之山有木焉葉狀
如樗而赤實名曰亢木食之不蠱 物類相感志東南
荒中有邪木高二三十丈葉如甘瓜子如寒瓜蔓覆其
頂子味甘如蜜食之令人身有澤不可過三升令人冥

醉半日乃醒唯多羅之民善緣能得之 山海經招搖

之山有木焉其狀如穀而黑理其花四照其名迷穀佩
之不迷少室之山有木焉其名曰帝休狀如楊其枝五

衢黃華黑實服者不怒

五衢言其枝交錯
五出如衢路也

符禺之山其

上有木名曰文莖其實如棗可以已聾命者之山有木

焉其狀如穀而赤理其汁如漆其味如飴食者不饑可

以釋勞其名曰白荅

音高

可以血玉

血謂可用染玉作光
彩白荅一名臯蘇

講山有木焉名曰帝屋葉如椒反傷赤實可以禦凶傷

刺下
句也

陰山多雕棠葉如榆葉而方實如赤菽食之已聾

有木焉名曰天樞方莖而葵狀服者不噎

食不噎也

拾遺

記周靈王起昆昭之臺聚天下異木得崕谷陰生之木

其枝千尋文理盤錯有龍蛇鳥獸之形

酉陽雜俎頓

丘南有應足山山上有一樹高十丈餘皮青滑似流碧

枝幹上聳子若五綵囊葉如亡子鏡世名之仙人獨桓

樹 庶物異名疏賓連濶達祥樹也白虎通曰繼嗣分

明則賓連生於房戶連累相承故在於房戶象繼嗣也

瑞應圖曰王者嫡庶有序男女有別則賓連濶達生於房

附竹

總論 說文竹冬生艸也象形 禮月令日短至則伐木取竹箭注陰盛則材成故伐而取之大曰竹小曰箭
爾雅東南之美者有會稽之竹箭焉注竹箭篠也

周禮孤竹之管孫竹之管陰竹之管注孤竹竹特生者
孫竹枝根之未生者陰竹生山北者 家語南山之竹

不揉自直 史記渭川千畝竹其人與千戶侯等 竹

譜竹得風其體大屈謂之竹笑 天寶遺事太液池岸

有竹數十叢牙筍未嘗相離密密如栽也帝呼爲竹義

青瑣高議寇萊公貶死於雷州詔還葬道過公安民

皆迎祭斬竹插地以挂紙錢而焚之尋復生筍成林邦

人神之號曰相公竹 莊子羊奚比乎不筭注不筭久

竹言其不能復生筭也 五雜組竹名如母後筭之生

必高前筍竹初出土時極難長累旬不盈尺逮至五六

尺時潛記其處一夜輒尺許矣 說文楚謂竹皮曰箬

字書擗竹皮也 禮器如竹箭之有筠注筠竹青皮

也竹無心其堅彊在膚 瑣碎錄峽州玉泉鬼谷子洞

前有叢竹竹葉有文成符葉葉不同佩之可以辟患

羅浮山記羅浮山東有溪曰羅陽永泰中暑雨漲有竹

葉若芭蕉葉隨水流出 本草竹葉名升斤竹花名草

華 莊子鵷鷖非練實不食注練實竹實也取其潔白

李旼該聞集舊稱竹實爲鸞鳳所食今近道竹間時

見花開如棗結實如麥江淮號爲竹米以爲荒年之兆
其竹即死竹譜根幹枯朽花復乃懸陸龜蒙詩青復未
成孤鳳餓唐詩老屋茅生菌饑年竹有花信非鸞鳳之
食也近有餘干人來言彼有竹實大如雞子竹葉層層
包裹味甘勝蜜食之令人心肺清涼生深竹林茂密處
頃因得之雖日久枯乾而味尚存乃知鸞鳳所食必非
常物也 五侯鯖復音復竹結子每六年一結花不爲妖
晉書惠帝元康二年春巴西郡界竹生花紫色結實

如麥外皮青中赤白味甘 彙苑詳註明正德末饒州
山中羣竹不問大小俱開花結實人采烹之但味澁而
不可多食多則腹脹 俞宗本種樹書竹有花輒槁死
結實如稗一竿如此久之則滿林皆然其治法於初米
時擇一竿稍大者截去近根三尺許通其節以糞之則
止 朝野僉載人家竹花枯死者家長當之 酉陽雜
俎江淮有竹肉生節上如彈丸味如白樹雞 丹鉛總
錄竹亦有香人罕知之杜詩風吹細細香李賀詩竹香

滿幽寂粉節塗生翠 世說王徽之嘗借居空宅中便

令栽竹或問之徽之但嘯咏指竹曰何可一日無此君

耶 郡國志儋州滔泐井與淪水通有人以竹置井口

淪水得之人呼竹爲滔泐因以爲名 酉陽雜俎李衛

公守北都唯童子寺有竹一窠纔長數尺相傳其寺每

日報竹平安 襄陽耆舊傳辛仲宣截竹爲罍以酌酒

曰吾性愛竹及酒欲令二物相竝耳 東陽記崑山去

蕪城山十里山嶺高峻常秀雲表父老傳云嶺上有員

池池邊有竹極大風至垂屈掃地恒潔淨如人掃然
荊州記天門山角上各生一竹倒垂拂拭謂之天帚

永泰記小江緣岸有仙石壇有竹嬋娟青翠風來枝動
掃石壇壇上無塵也 湘州記邵陵高平縣有文竹山

上有石牀四面綠竹扶疎常隨風委拂此牀 華陽國

志有竹王者興於遯水始有一女浣於水濱有三節大
竹流入女足間推之不去聞有兒聲持歸破竹得男長
養有武才遂自立爲夜郎王以竹爲姓所破竹於野成

林今王祠竹林是也 海錄或問鬼所惡荅曰最惡金姑聲閩人謂破竹聲爲金姑聲

種竹法 志林竹有雌雄雌者多筍故種竹常擇雌者凡欲識雌雄當自根上第一枝觀之有雙枝者爲雌即出筍若獨枝者是雄竹 仇池墨記種竹自根而上至生稍一節發者爲雄二節發者爲雌 四民月令五月十三日謂之竹醉又謂竹迷是日栽竹多盛 岳州風土記五月十三日謂之龍生日栽竹多茂盛 山家清

事風土記文心雕龍皆以五月十三日爲竹生日齊民
要術則以八月八日爲醉日比得之老園丁曰種竹無
時認取南枝又曰莫教樹知先鉏地令鬆且濶沃以渠
泥及馬糞急移竹多帶宿土種之勿蹈以足若換葉姑
聽之勿遽拔去又有二秘法迎陽氣則取季冬順土氣
則取雨時若慮風則去梢而縛架連數根種則易生筍
過此別無他法 埤雅竹物之有筋節者也今人穿沐
叢竹芟其繁亂不使分其勢然後枝幹茂擢俗謂之洗

洗竹第如洗華例非用水也竹之初生其色綠長則綠
轉而青矣舊說竹率六十年根輒一易即華實而枯死
實落於土復生六年成疇種樹書凡種竹正二月剷
取西南根於東北角種其鞭自行西南蓋竹性向西南
行也諺云東家種竹西家種地草木狀竹宜高平之
地種樹書種竹處當積土令稍高於傍地二三尺則
雨潦不侵損錢唐人謂之竹脚

名類 易說卦傳震爲蒼筤竹 尚書揚州厥貢篠簜

荊州厥貢惟箛簞注篠箭竹簞大竹箛簞美竹也 字

林箛

音模

竹黑皮竹有文簞

音感

竹有毛簞

力印反

竹實中

廣志欏竹細而多刺也簞竹堪作笛

海錄碎事紫雲

蓋慈竹也赤玉脂桃竹也青蛇枝苦竹也紅鵲尾青竹

也 詞林海錯竹一名林筴即袁公與越女試劍竹也

曰防露蜀中竹也曰金貓其節有金色 南方草木狀

思摩竹如竹大而筍生其節筍即成竹春而筍復生節

焉交廣所在有之又石林竹似桂竹勁而利削爲刀割

象皮如切芋出九真交趾

廣州記作石麻竹

戴凱之竹譜篁

竹堅而促節體圓而質堅皮白如霜粉大者宜行船細者爲笛 竺法真羅浮山疏嶺南道無筋竹惟此山有之其大尺圍細者色如黃金堅貞疎節 永嘉記陽嶼有仙石山頂上有平石方十餘丈名仙壇壇陬有筋竹歲澌青翠風來動音自成宮商石上淨潔初無粗穢

異苑東陽畱道德家中筋竹林忽生連理 酉陽雜俎筋竹南方以爲矛筍未成竹時堪爲弩絃 續博物志

篴竹青皮內白如雪輒韌可爲索 通志竹之良者有

篴竹其自死筍謂之仙人杖 竹譜筍竹高節實中狀

若人刻俗謂之扶老竹張騫云出身毒國廣志云出南

廣邛縣張孟陽云出興古盤江縣 山海經注交趾有

篴竹實中勁強有毒銳以刺虎中之則死 天中記新

州石城陝隘宋紹興中州守黃濟植筍竹圍繞之竹有

刺芒棘森然羔豚不能入 廣志筍竹宜爲屋椽 竹

譜筍竹楚謂之竿箴一枝數葉葉大如履可以作篷冬

夏生筍 事物紺珠 籜竹出卧龍山長百丈只稍上有
葉 異物志 簣簣竹生水邊長數丈圍一尺五六寸一
節相去六七尺或去一丈廬陵界有之 異苑建安有

簣簣竹節中有人長尺許頭足皆具 竹譜 筍簣竹又

名合肚大如脚指長丈餘堅厚修直腹中白幕闌隔如
濕麪生衣六月生筍將成竹而筍皮未落輒有細蟲嚙
之隕擗後嚙處往往成竒文如繡畫可愛 酉陽雜俎

筍簣百葉爲一枝 竹譜 籜簣竹生於漢陽內實外澤

時獻以爲輅馬策見南郡賦 南方草木狀篋篲竹皮

薄而空多大者徑不過二寸皮粗澁以鏹犀象利勝於

鐵出大秦 異物志篋篲竹出思牢國可礪指甲新州

有此種製成琴樣爲礪甲之具用久微滑以酸棗漬之

過宿快利如初亦可作箭李商隱所謂篋篲弩箭磨青

石是也 詞林海錯澀勒竹名竹膚有芒可以剉瓜

竹譜廬山出竹莖大如指竹杪細葉密翠如帚彼人採

爲方物贈人謂之掃雲帚 花木考雪竹出廣西斑極

大色紅而有暈 羣芳譜月竹每月抽筍狀輕短叢生
如箭筍不堪食產嘉定州 暘谷漫錄張堂云同邑安
福西鄉周俊叔家嘗得十二時竹一根植之家庭歷十
有餘年筍而竹者纔三竹繞節凸生子丑寅卯辰巳午
未申酉戌亥十二字點畫可數 事物紺珠水竹出黔
南管內或巖下澤水中其筍隨水深淺以成節若深一
丈則筍出水面爲一節 南方草木狀越王竹根生石
上若細荻高尺餘南海有之南人愛其青色用爲酒籌

云越王棄餘算而生竹 松江府志王莽竹種最大而節間促二十餘節後方生枝葉近根有一錢痕俗傳王莽藏銅瓦其中以爲識云 雨航雜錄雁山五珍有觀音竹形小葉長翠潤奪目植巖石上經冬不凋 瀛涯勝覽占城國產觀音竹如藤長丈八尺許色如黑鐵每寸約二三節 清異錄秦維言雙竹自是一種有成林者因出三拄杖皆兩岐後問浙人云此是天親竹有時出一番雙筍故例皆分岐亦非年年有之 華陽國志

哀牢夷有竹其節相去一丈名僕竹 格古要論鉞兒

竹孩兒竹出西蜀下有尺許如豬大腸 會稽縣志公

孫竹高不盈尺可爲几案之玩 述異記詩義云南中

生子母竹今慈竹是也漢章帝三年子母竹筍生白虎

殿前時謂之孝竹羣臣作孝竹頌 酉陽雜俎慈竹夏

月經雨滴汁下地生蓐似鹿角色白食之已痢 花木

考慈竹秋筍高數丈尾甚柔細如釣絲又名釣絲竹歷

冬及春始開葉其葉左右竝列如鳥翎狀初歲極嫩土

人破爲篾裂以成麻可爲屨號竹麻屨出叙州府 潛
確類書釣絲竹生廣右兩江安南大槩一如蕩竹深秋
出筍隔年成竹笋過母時梢極細弱彎曲垂下宛如釣
絲山海經所謂噐水之北多釣端竹者疑即此是 五
侯鯖垂絲竹出雲南枝柔軟下垂 羣芳譜人面竹出
剡山竹徑幾寸近本逮二尺節極促四面參差竹皮如
魚鱗面凸頗類人面 五雜組人面竹其節紋一覆一
仰如畫人面然 山海經龜山多扶竹 丹鉛總錄武

林山西舊有雙竹院中所產修篁嫩篠皆對抽竝發王
子敬竹譜所謂扶竹譬猶海上之桑兩兩相比謂之扶
桑也扶竹之筍名曰合歡 五侯鯖合歡竹出九嶷山
筍長獨莖及生枝葉分爲兩梢故名 丹鉛錄蜀涪州
有相思崖昔有童子卅女相悅交贈今竹有桃釵之形
筍亦有柔麗之異崖名相思崖竹曰相思竹 永嘉郡
記張廡家有苦竹數十頃屋其中居之 齊民要術安
思縣多苦竹竹之醜類也有四有青苦者白苦者紫苦

者黃苦者 南越志羅浮山第三十一嶺半是巨竹皆

七八圍長一二丈有三十九節葉若芭蕉謂之龍鍾竹

常有鸞鳳棲宿其上

羅浮山記
作龍公竹

東齋記事辰州有一

種小竹曰龍孫竹生山谷間高不滿尺細僅如針凡所

以爲竹無不具前輩詩有小竹如針能具體即此也

五侯鯖龍牙竹出永嘉人取之必有雷電下山即止

羣芳譜龜文竹崇陽縣寶陀巖產僅一本製扇甚奇聞

今亦絕種矣 事物紺珠雞脰竹似篁纖細大不過指

疎葉黃皮無用惟筍美 無錫縣志護居竹一名哺雞
言其筍如雞卵之多 清異錄江湖間有一種野竹其
葉糾結如蟲狀山民曰此蚱蜢竹也 臨海異物志狗
竹毛在節間 事物紺珠貓竹又名貓頭竹其根類貓
頭又名潭竹大莖細葉 羣芳譜貓竹一作茅竹又作
毛竹幹大而厚異於衆竹人取以爲舟四明洞天記毛
竹叢生澗邊又金庭山洞天皆有 方輿勝覽毛竹洞
在西溪上流去武夷山百餘里徧生毛竹每節出一幹

其巨細與根等

格古要論湖廣黃州府蘄州有竹名

蘄竹爲竹簾其節平人睡則涼而不生痕今謂之蘄簾

蘄笛自唐得名 羣芳譜蘄竹以色瑩者爲簾節疎者

爲笛帶鬚者爲杖 虞初志柯亭竹生雲夢之南以七

月望前生明年七月望前伐過期伐則音滯末期伐則

音浮 雲窗私志凝波竹出區吳山紫枝綠葉堅滑如

玉風吹有聲如環佩成帝種於臨池觀更名曰環佩竹

花如海榴實如蓮子而小服之肌滑體輕趙飛燕舞於

手掌上服此實也

拾遺記蓬山有浮筠之簌葉青莖

紫子如大珠有青鸞集其上下有砂礫細如粉暴風至
竹條翻起拂細砂如雪霰仙者來觀戲焉風吹竹折聲
如鍾磬之音又岑華山在西海之西有蔓竹爲簫管吹
之若羣鳳之鳴 丹陽記江寧縣南二十里慈母山積
石臨江生簫管竹王褒洞簫賦所稱即此也其竹圓緻
異於餘處自伶倫採竹嶰谷其後唯此簌見珍故歷代
常給樂府而俗呼曰鼓吹山 荊州記臨賀冬山中有

大竹數十圍高亦數十丈有小竹生其旁皆四五圍下有盤石徑四五丈極方正青如彈棊局兩竹曲垂拂埽石上初無塵穢未數十里間風吹此竹如簫管之音

羣芳譜弓竹長百尋却曲如藤得木乃倚出東方質有文章須膏塗火灼乃見竹譜箭竹節間三尺堅勁中

爲矢潛確類書射筒竹細小通長丈餘亦無節可以

爲箭筒清異錄荆南判官劉彧棄官遊秦隴閩粵篋

中收大竹拾餘穎每有客則斫取少許煎飲其辛香如

雞舌湯人堅叩其名曰謂之丁香竹非中國所產也

華陽國志錦江心礮石上產桃竹可爲杖竹性中虛此竹獨實類木 竹譜桃枝竹皮滑而黃可以爲席 山

海經嶠冢之山嚚水之上多桃枝竹 魏志倭國有桃

枝竹 廣州記廣州有桃枝竹 物類相感志欒櫚竹

出南海葉似欒身斑可愛嶺表人用作杖心堅實亦名陶枝蜀中亦生復似科藤之屬也 格古要論欒竹出

西蜀廣西葉如棕櫚其身似竹堅且實又名桃竹 羣

芳譜棕竹有三種上曰筋頭梗短葉垂堪置書几次曰短棲可列庭階次曰撲竹節稀葉硬全欠溫雅但可作扇骨料耳 事物紺珠木竹出韶州一莖如萬歲藤一節長四尺無花而實如草豆蔻土人鹽之爲果 寰宇記竹林堂宋臨川王義慶所作梁元帝因而修之堂前有竹名桂竹出始興桂陽縣來風防露上合下疎每日出羅紈金翠春光秋月隔林而望若花開也其西有篠箭冬月抽笋似桂而辛隆暑赫曦但有涼氣入其下者

咸以御風 山經注始興郡桂陽縣出筰竹大者圍二

尺長四丈 鄧元錫函史筰竹可絲以制器又可刺船

江楚常用之 事物紺珠筰竹又名倭竹種自倭國

南越志宋昌縣有棘竹長十尋大如甕其間短者輒六

七丈也里人取以爲弓爲竹叢薄葉下有鉤刺或在條

末如芒針也 酉陽雜俎棘竹一名芭竹節皆有刺數

十莖爲叢南夷種以爲城猝不可攻或自崩根出大如

酒甕縱橫相承狀如縲車食之下人髮 海槎餘錄茨

竹大如指長逾二丈節節生枝文采人家用植於居之
周遭以代垣牆雖雞犬不能逾越陰森柔嫩綠潤如沃
可愛也 續竹譜紅竹出峽州宜都縣飛魚口大者不
過寸許鮮明可愛 事物紺珠丹竹出道州每節可一
丈徑不大裊裊搖空粉節上有丹色心空肉薄人劈爲
百丈綵 睽車志補陀落伽山觀音坐後旃檀林紫竹
幹葉如丹 花木考紫竹小而色紫宜傘柄簫笛用
羣芳譜丹青竹葉黃碧丹相間出熊耳山 趙潛養疴

漫筆成。都古今記云：對青竹、竹黃而溝青，故每節若間出。云此竹今浙中亦有之，惟會稽頗多。彼人呼爲黃金間碧玉。華陽國志成：都有竹，名對青、半青、半紫、二色、相映可愛。五雜俎：黃金間碧玉，竹其節一黃一碧，正直如界然。遊南城記：中伯園中有對金竹，其狀與對青相似。松江府志：黃菰竹，節目疎聳，皮黃，力韌，爲篾器之良。博物志：洞庭之山，帝之二女啼以涕，揮竹竹盡斑。今下雋有斑皮竹。事物紺珠：斑竹有點，暈筍極。

美又名淚竹又名湘妃竹 地理志雷州土貢電斑竹

事物紺珠毛斑竹出蘄州初伐無斑灰汁洗之則斑

見 格古要論湘竹出廣西斑細而色淡有暈中一點

紫與蘆葉上斑相似作簫管最貴 東齋記事武陵桃

源山有方竹四面平整如削堅勁可以爲杖 畱青日

札唐書高宗遣宦者采怪竹江南將時上苑今江南方

竹即此類也寧波志云葛仙翁煉丹於定海靈峰植竹

筴化爲竹而方 桂苑談叢方竹出大宛國堅實而正

方節眼鬚牙四面對出實衛公之所寶也 北戶錄澄

州產方竹其隔州亦出大者數丈 格古要論方竹出

西蜀浙江杭州府西湖飛來峰山上亦有之其竹節上

有刺蜀人謂之刺竹 妮古錄高皇帝燕處武樓中詹

同在左右偶理竹事帝曰竹之類其亦多乎同對曰其

實晉戴凱之譜五十餘種或根如盤輪或節若束針或

細則勝箭或鉅可爲舟有未能歷舉者大槩其色皆青

其體皆圓也惟吳越山中有名方竹者最爲侏異四稜

直上弗偏弗頗若有廉隅不可犯之色以故士大夫愛之往往采而爲筇既退獲一枝以獻帝摩挲觀之親灑翰墨草方竹記一通 雲南記雲南有實心竹文采斑駁殊好可爲器物其土以爲槍幹交牀 物類相感志疎節竹出南方水中筍萌時隨水高低成節也又秦大國有竹一節可長九尺 北戶錄高潘州有疎節竹五六尺一節僧道多以爲杖又秦州通竹直上無節空心也 事物紺珠古散竹節似馬鞭葉似桐而小皮似棕

柔軟


北戶錄古散堪爲拄杖

山海經衛丘山南帝

俊竹林在焉大可爲舟註俊音舜舜林中竹一節則可
以爲船 南方草木狀雲母竹一節爲船出扶南 神
異經篩竹一名太極長百餘丈南方以爲船 神異經
南方荒中有涕竹長數百丈圍三丈五六尺厚八九寸
可以爲船其筍甘美煮食之可以止創癘 玉篇篲竹
甚可爲舟 南征八郡志嶺南有大竹數圍實中任屋
梁柱覆用之則當瓦 南方草木狀由梧竹吏民家種

之長三四丈圍一尺八九寸作屋柱出交趾 異物志
有竹曰筥其大數圍節間相去局促中實滿堅強以爲
屋椽斷截便以爲棟梁不復加斤斧也 桂海虞衡志
瑤人以大竹爲釜物熟而竹不灼 孝經河圖少室之
山大竹堪爲釜甑 玉堂漫筆衡山後生竹最大名曰
南竹土人截取其筒以爲甑節處可置盥盆然在深山
中人跡不到之處 廣志永昌有漢竹圍三尺餘大者
一節受一斛小者數升爲裊榼 華陽國志南垂界有

百葉竹一枝百葉故名又名箒竹有毒夷人以刺虎豹
中即斃 事物紺珠千年竹出水簾洞石上葉稍似竹
高者二寸許 天中記三稜竹若棕櫚葉莖柄三脊川
中人家竹林中忽有此吉兆也 通雅沈存中云本草
南燭草乃木也名南天燭今人植庭側葉似楝秋實赤
如丹按此俗所謂天竹也 事物紺珠單竹大者如排
虛細長爽嶺南取其筍未及成竹者灰煮績爲布



格致鏡原卷六十七

欽定四庫全書

子部

格致鏡原卷

六十五
七十

詳校官中書臣羅錦森

侍讀臣孫球覆勘

總校官中書臣朱 鈐

校對官原任典簿臣郭祚熾

謄錄監生臣葉世華

欽定四庫全書

格致鏡原卷六十八

大學士陳元龍撰

草類

總

爾雅注卉百草總名草謂之榮不榮而實者謂之秀秀而不實者謂之英茨根也禹貢兗州厥草惟繇揚州厥草惟夭禮記季春生氣方盛勾者畢出萌者盡達孟夏靡草死季夏大雨時行燒薙行水利以殺草大

戴禮孟春冰泮百草權輿 淮南子神農始嘗百草一
日七十毒 方言凡草生而初達謂之花江淮陳之內
謂之葎青齊究蕪之間謂之葎燕之北鄙朝鮮冽水之
間謂之策 淮南子根拔生程若程若生玄玉玄玉生
醴泉醴泉生皇辜皇辜生庶草凡根拔草者生於庶草
後漢書定昌羌俗無文字但候草榮落以紀歲時
玉篇舊草不芟新草復生曰芄音仍 彙苑草稠曰薦深
曰莽

著

說原草植三百六十著為之長 周易聖人幽贊於神明而生蓍又蓍之德圓而神 本草蓍如蒿叢生條直秋後花生枝端紅紫如菊花結實如艾實七十年益一莖生少室山及上蔡縣 洪範五行蓍之為言耆也百年一本生百莖此草木之壽亦知吉凶者 史記天下和平蓍莖長一丈其聚生百莖共根今世取蓍八十莖長八尺即難得矣得六十莖長六尺即可用 淮南子

上有叢著下有伏龜
龜策傳著滿百莖下有神龜守
之其上嘗有青雲覆之

芝
附肉芝

紀瑞 孝經援神契王者德至草木則芝草生 白虎
通王者德至於山則芝實茂 瑞應圖芝英王者親近
耆老養有道則生 論衡芝生於土土氣和故芝草生
徐整長曆黃帝以五芝為房宮 羅泌路史黃帝陞
鴻隄受神芝於黃蓋 漢書武帝元封二年甘泉宮生

芝草九莖連葉乃作芝房之歌 三輔黃圖甘泉宮芝

金色綠葉朱實夜有光 漢書宣帝神爵元年金芝九

莖產於函德殿銅池中 古今注章帝元和二年芝生

沛如人冠又生章武如人抱三子狀建初五年芝生潁

川以六月中生一葉五歲五重春青夏紫秋白冬黑十

月後黃氣出上尺五寸 繆襲神芝贊魏文帝青龍元

年芝產於長平之習陽許昌農家其色丹紫其質光曜

上別為三幹分為九枝散為三十六莖委綬連屬有似

珊瑚之狀 唐春秋太宗貞觀十九年雍州李樹生芝
英赤蓋紫光色鮮麗肅宗上元二年皇后奏含暉院生
金芝 唐書太宗寢室中產芝十四莖並為龍翔鳳翥
之形玄宗時有玉芝產於大同殿柱礎一本兩莖神光
照於殿 雜俎天寶初臨川郡人李嘉胤所居柱上生
芝草形類天尊太守張景佚截柱獻之 杜陽編處士
伊祁玄解於衣帶間出三年藥實為上種於殿前有雙
麟芝色褐一莖兩穗隱隱形似麟頭尾悉具中有子如

瑟瑟 舊唐書肅宗延英殿御座梁上生玉芝一莖三
花 法苑珠林唐大理司直河內司馬喬卿天性純謹
有志行永徽中為揚州司戶曹丁母憂居喪毀瘠骨立
刺血寫金剛般若經二卷未幾於廬側生芝草二莖九
日長尺有八寸綠莖朱蓋日澀汁一升食之味甘如蜜
取而復生 清異錄杜荀鶴舍前椿樹生芝草明年及
第以漆彩飾之安几硯間號科名草 孝子傳宋易延
慶父喪廬墓產玉芝十八莖葩葉扶疎好事者繪為圖

湧幢小品嘉靖時御醫李果進玄岳鮮芝四十本鄴
縣民聚芝百八十一本為山以進內有徑一尺八寸者
數本號曰仙應萬年芝山又御醫黃金進芝山四座計
三百六十本

詳類 神農草木經青芝生太山赤芝生衡山黃芝生
嵩山白芝生華山黑芝生常山皆久食輕身延年不老
茅君內傳玉芝色白如玉 抱朴子石象芝生於海
隅名山及島嶼之涯狀如象有頭尾四足附於大石赤

者如珊瑚白者如截肪黑者如漆澤青者如翠羽黃者如紫金皆光明洞澈如堅冰晦夜去之三百步便望見其光矣玉脂芝生於有玉之山常居懸危之處玉膏流出萬年已上則凝而成芝有似鳥獸之形色無常采面鮮明如水晶七明九光芝生臨水之高山石崖之間狀如盤碗有莖蒂連綴之起三四寸有七孔者名七明九孔者名九光光皆如星食之盡一觴令人身有光所居暗地如月石蜜芝生少室石戶中石桂芝生名山石穴

中似桂樹而實石也高尺許有枝條石腦芝生滑石中

五色光明而自動石硫黃芝五嶽俱有而箕山為多許

由服此而長生

以上皆石芝也

松脂淪入地千歲化為茯苓萬

歲其上生小木狀似蓮花名曰威喜芝夜視有光持之

甚滑燒之不燃帶之可辟兵又松樹枝三千歲者其皮

中有聚脂狀如龍形名曰飛節芝大者重十觔菌芝生

深山中或大木之下或生泉側其狀或如宮室車馬龍

虎人形飛鳥五色無常樊桃芝其木如升龍其花葉如

丹羅其實如翠鳥高不過五尺生於名山之陰東流泉水之上參成芝赤色有光扣其枝葉如金石之音折而續之即復如故木渠芝寄生大木上如蓮花九莖一叢建木芝生於都廣其皮如纓蛇其實如鸞鳥黃廬子尋木華玄液華此三芝生於泰山要鄉及奉高以上皆木芝也獨搖芝無風自動其莖大如指赤如丹素葉似莧其根有大魁如斗有細者如鷄子十二枚周繞大根之四方相去丈許皆有細根如白髮以相連生高山深谷所生處

左右無草人懷其大根即隱形欲見則左轉而出之牛角芝生虎壽山及吳坂上狀似蔥特生如牛角長三四尺青色龍仙芝狀如昇龍之相負以葉為鱗其根則如蟠龍麻母芝似麻而莖赤色花紫色紫珠芝花黃葉赤實如李而紫色二十四枚輒相連而垂如貫珠也白苻芝高四五尺似梅常以大雪而花季冬而實朱草芝九曲曲有三葉五德芝狀如樓殿莖方其葉五色各具而不雜上如偃蓋中有甘露紫氣起數尺龍御芝以仲春

對生三節十二枝下根如坐人

以上皆草芝也

凡服之者皆與

天地相畢 漢武內傳西王母曰仙藥有太真紅芝草

拾遺記岱輿有七色芝生玉梁下其色青光輝耀謂

之蒼芝 酉陽雜俎良常山有螢火芝其葉似草其實

如豆紫花夜視有光食一枚心中一孔明食至七心七

竅洞澈可夜書 茅君內傳句曲山五芝求之者投金

環二雙於石間勿顧念必得矣第一芝名龍仙第二芝

名叅成第三芝名燕胎第四芝名夜光洞草第五芝名

料玉 真誥羅江大霍有洞臺中有五色隱芝華陽洞
亦有五種夜光芝其實墜地如七寸鏡包山中有白芝
真仙通鑑食四節隱芝者位真卿食金闕玉芝者位
司命食流明金英者位司祿食長曜雙飛者位真伯食
夜光洞草者左右御史 廣博物志青雲芝生於名山
之陰青蓋三重上有雲氣覆之食之能乘雲通天月精
芝秋生山羊石上服之長生 東坡尺牘文登島中出
一藥名白石芝狀如石耳而有香味 酉陽雜俎仙經

言穿地六尺以鑲實一枚種之灌以黃水五合以土堅
築之三年生苗如匏實如桃名鳳腦芝 臞仙神隱芝
有二種紫白二色如菌而有莖長尺餘豫章西山最多
其靈芝生石上形如石可服 博物志名山生神芝不
死之草上芝為車馬形中芝為人形下芝為六畜形
酉陽雜俎屋柱木無故生芝黑為賊黃為喜

別名 爾雅邢疏芝草一年三花一名茵一名芝 楚
辭采三秀於山間王逸注三秀芝草也 格物論芝瑞

草一名菌蠹 瑞應圖王者仁義行則生紫脫 齊民

要術紫脫北方物即芝也 江淹詩瑶草正翕艷李善

注瑶草玉芝也 續古今注靈芝一名壽潛一名希夷

本草經赤芝一名丹芝黃芝一名金芝白芝一名玉

芝黑芝一名玄芝紫芝一名木芝

肉芝 仙史武陽北平山有白蝦蟇謂之肉芝王喬食

以仙去 抱朴子行山中見小人乘車馬長七八寸者

肉芝也捉取服之即仙矣 神仙感遇傳蕭靜之掘地

得物類人手肥潤而白烹食之踰月髮再生貌少力壯
遇道士曰所食者肉芝也壽等龜鶴矣

菖蒲

總論 春秋運斗樞玉衡星散為菖蒲遠雅頌著倡優
則玉衡不明菖蒲冠環 曲術堯時天降精於庭為薤
感百陰為菖蒲焉 呂覽月令冬至後五十七日菖始

生菖百草之先生者也於是始耕 孝經援神契菖蒲
益聰 呂氏春秋一名堯薤能烏髮 說文菖蒲一名

昌歎 左傳王使周公閱來聘饗有昌歎 說苑文王

好食菖本菹 演繁露文王嗜昌歎仲尼食之以取味

事見呂氏春秋 淮南子昌羊去蚤虱而來蛉窮 昌

羊菖蒲也蛉窮蟲蜒入耳之蟲也 草木狀番禺東有

澗澗中生菖蒲皆一寸九節安期生採服仙去但留玉

舄焉 抱朴子韓眾服菖蒲十三年身上生毛日視書

萬言冬袒不寒 清異錄宜春太守虞杲郡齋植菖蒲

五檻次子夢髯翁自號昌九言願賜保養 海墨徽言

僧普寂好菖蒲種成獅子鸞鳳仙人之狀 清異錄進

士侯寧號菖蒲為綠劍真人 歲時記端午刻菖蒲為

小人子或為葫蘆形帶之辟邪 卉譜四月十四菖蒲

生日修剪根葉無踰此時 農圃六書種石菖蒲法春

遲出夏不惜秋水深冬藏密又云添水不換水見天不

見日宜剪不宜分浸根不浸葉

詳類 本草一名昌陽其根盤屈有節狀如馬鞭一根

旁引三四根九節者佳 遜齋閑覽楚詞所咏香草曰

孫者即今人所謂石菖蒲也 格物論今一種根苗纖

細石上所生人以瓦石器種之屢易水則茂水濁則萎
此名石菖蒲 東坡石菖蒲贊序凡草木之生石上者
必須微土以附其根如石韋石斛之類雖不待土然去
其本處輒槁死唯石菖蒲并石取之濯去泥土漬以清
水置盆中可數十年不枯雖不甚茂而節葉堅瘦根鬚
連絡蒼然於几案間久而益可喜也 羣芳譜菖蒲有

數種生於池澤肥根者泥蒲也名白菖生於溪澗瘦根

者水蒲也名溪蓀生於水石間葉有劍脊瘦根密節愈剪愈細葉茸如韭者石菖蒲也根長二三分葉長寸許可置几案者錢蒲也石菖蒲種類有虎鬚蒲見土則粗見石則細燈前置一盆可收燈烟不薰眼龍錢蒲盤旋可愛且變化無窮缺水亦活又有香苗劍脊金錢牛頂臺蒲皆品之佳者 羅浮山記山中菖蒲一寸二十節堅芬之極

花 風俗通菖蒲放花人食之延年 梁書武帝母張

氏見菖蒲生花傍人皆不見吞之已而生帝 物類相
感志菖蒲紅者芳氣酷烈世言有花無人見見者必大
富貴趙隱之母傅氏於山澗中見花大如車輪有神人
守護誡之勿洩後享富貴年九十四忽向子孫說之得
疾而終 後魏典略孝文帝南巡至新野臨潭水兩見
菖蒲花遂為建兩菖蒲寺以美之 蘇集子由盆中石
菖蒲忽生九花

芭蕉

總論 埤雅芭蕉不落葉一葉生則一葉焦故謂之蕉

格物論芭蕉叢生根出地面兩三莖成一簇 本草

一名芭苴江南所在有之根葉與甘蕉同惟子不堪食

出廣閩者有花其實美可噉 羣芳譜芭蕉外微青裏

白三年以上即著花生中土者花苞中積水如蜜名甘

露清晨取食甚香甘止渴延齡不結實生閩廣者結蕉

子蕉之小者以油簪橫穿其根二眼則不長大可作盆

景 高僧傳懷素種芭蕉數萬以代紙號其所曰綠天

菴 清異錄南漢貴璫趙純節性喜芭蕉凡軒窓館宇
咸種之時稱純節為蕉迷 清異錄廣主嘗與幸姬李
蟾妃微行至蘇氏園憩酌綠蕉林廣主命筆大書蕉葉
曰扇子仙蘇氏於其所起扇子亭

甘蕉 本草甘蕉乃是有子者其卷心中抽幹作花初
生大萼如倒垂齒齒紅者如火炬謂之紅蕉白者謂之
水蕉閩人以灰埋其皮令滑績以為布 南方草木狀
甘蕉望之如樹林大者一圍餘葉長一丈或七八尺廣

二尺許花大如酒杯色如芙蓉莖末百餘子各為房相連甜美亦可蜜藏實隨花長每一花各有六子先後相次子不俱生花不俱落一名芭蕉或曰芭苴此有三種子大如拇指長而銳類羊角者味最甘好一種子大如鷄卵類牛乳者味次之一種大如藕子長六七寸形正方味最下也其莖解散如絲以灰練之可紡織如絺綌謂之蕉葛然脆而黃不如葛也交廣俱有之 廣志莖如水山芋重皮相裹大如孟葉廣尺長丈許有角子長

六七寸兩兩相對若相抱剥其皮色黃白味似蒲萄而
脆亦飽人 三輔黃圖扶荔宮植甘蕉十二本 遊名
山志赤巖山水石之間有甘蕉林高者十餘丈

美人蕉 楓窻小牖廣中美人蕉大都不能過霜節惟

鄭皇后宅中鮮茂倍常盆盎溢坐不獨過冬更能作花
留青日札廣西產美人蕉樹不甚高花瓣尖大紅色

甚美 閩部疏余以盛冬入福州芭蕉葉無凋者廨中
美人蕉纈紅鮮甚比出過延平已入春而蕉葉始放乃

知二百里外蕉無冬葉矣然吳中蕉三月始抽萌視延
津尚遲兩月 羣芳譜美人蕉產福建福州府者其花
四時皆開深紅照眼經月不謝中心一朶曉生甘露又
有一種葉與他蕉同中出紅葉一片者一種葉瘦類蘆
箬花正紅如榴花日折一兩葉其端一點鮮綠可愛者
俱亦有美人蕉之名 益部方物略紀紅蕉於芭蕉蓋
自一種葉小其花鮮明可喜蜀人語染深紅者謂之蕉
紅蓋倣其殷麗云

按紅蕉即
美人蕉

酉陽雜俎南中紅蕉花

時有紅蝙蝠集花中

各種蕉 學圃雜疏芭蕉有一種名金蓮寶相不知所從來葉尖小如美人蕉種之三四歲或七八歲始一花作黃紅色而瓣大於蓮故名 海槎餘錄儋耳芭蕉常年開花結實有二種一曰板蕉大而味淡一曰佛手蕉小而甜俗呼為蕉子作常品不似吾江南茂而不花而不實也 桂海虞衡志芭蕉極大者名牛子蕉又雞蕉子小如牛蕉亦四季實又牙蕉子小如雞蕉尤香

嫩甘美秋初實 羣芳譜膽瓶蕉根出土時肥飽狀如
膽瓶又鳳尾蕉一名番蕉產於鐵山如少姜以鐵燒紅
穿之即活能辟火患出江西贛州

卷耳

爾雅注卷耳象耳也亦名胡象江東呼為常象形如鼠
耳叢生如盤 詩疏卷耳一名苓耳葉青白色似胡蔓
白華細莖蔓生可煮為茹四月中生子如婦人耳瑱今
或謂之耳瑱草鄭康成謂是白胡蔓幽州人謂之爵耳

荆楚記卷耳一名瑤草亦曰蒼耳 本草卷耳一名
施一名鼠黏子俗謂道人頭 博物志昔洛中有人驅
羊入蜀而胡荈子著於羊毛之中蜀人得其種植之名
曰羊負來即今之荈耳也 東坡雜記蒼耳花葉根實
皆可食食久使人骨髓滿膚理如玉長生藥也

茱萸

詩疏茱萸一名馬舄一名車前一名當道喜在牛迹中
生故名幽州人謂之牛舌草可作茹大滑其子治婦人

產難

爾雅茅苕馬舄車前邢昺疏別三名也郭璞云

即今車前草大葉長穗好生道邊江東呼為蝦蟆衣王

肅引周書王會云茅苕如李出於西戎王基駿之云王

會所記雜物皆四夷遠國各齎土地異物以為貢贄非

周南婦人所得采是茅苕為馬舄之草非西戎之木也

木名
梓改

埤雅按本草云生平澤丘陵坂道中一名勝舄

亦謂之陵舄列子云生於陵屯為陵舄陵舄車前也韓

詩傳云直曰車前瞿曰茅苕蓋生於兩旁謂之瞿 圖

經春初生苗布地如匙面累年者長及尺餘如鼠尾花甚細青色微赤結實如葶藶赤黑色 神仙服食經車前一名地衣服之形化車前之實雷之精也善療孕婦難產及令人有子 本草芣苢一名牛遺 藥譜一名車輪菜產開州者良久服輕身明目

芣蘭

詩箋芣蘭嘗蔓於地有所依緣則起 爾雅注芣蘭蔓生斷之有白汁可啖 通志芣蘭草一名蘿摩又曰苦

九幽州人謂之雀瓢東人曰白環藤可作菜茹能補精益氣故諺云去家千里莫食蘿摩枸杞

兔絲

爾雅唐蒙女蘿女蘿兔絲又蒙王女邢疏唐也蒙也女蘿也兔絲也王女也一物而五名 埤雅在木曰女蘿在草曰菟絲舊說上有菟絲下必有伏菟之根無伏菟在下則絲不得生乎上然其實不屬也淮南子云下有伏苓上有菟絲又云菟絲無根而生 別錄菟絲子色

黃而細者名赤網色淺而大者名兔蘂 本草夏生苗

初如細絲徧地不能自起附他草梗則纏繞而生根漸

絕於地如寄空中 廣雅女蘿松蘿也 草木疏女蘿

今兔絲蔓連草生黃赤如金非松蘿 物性志兔絲實

非松蘿松蘿蔓生松上青長如帶與兔絲異 庚辛玉

冊火焰草即兔絲子陽草也初生有根及長延草物其

根自斷無葉有花結實甚細色黃 藥譜一名兔縷一

名兔蘆一名兔丘一名野狐絲一名金線草 彙苑女

蘿曰宛童又曰老禿驚抱朴子兔絲初生之根其形似兔掘取剖其血和丹服之立變化

藜藿

爾雅邢疏藜之科大為樹可以作掃彗一名箭一名王彗一名王帚江東呼為落帚又商藿似藜而葉大一名拜本草地膚即落帚子正字通地膚嫩苗可作蔬一科數十枝團簇直上子最繁一名地麥因其子形似也一名地蔡因其苗形似也一名益明因其子能明目

也俗名鴨舌草涎衣草子落老莖可為帚故又有落帚
獨帚王彗諸名 留青曰札藜可為杖禮記原憲杖藜
曲洧舊聞藜有二種紅心者俗呼為紅灰藿古人食
之多以為羹而今人少有食者其幹輕而堅以為杖尤
宜唐人猶有編為牀者仙方用之為秘藥取紅心者易
名為鶴頂草 留青曰札灰藿一名金鎖天時其白青
色者名曰忌女莖

蒺藜

易經困於石據於蒺藜 爾雅疏茨一名蒺藜布地蔓

生細葉子有三角刺人 師曠占術歲欲旱旱草先生

旱草蒺藜也 本草蒺藜有二道旁布地開小黃花子

三角四刺實有仁者名杜蒺藜俗呼刺蒺藜生同州沙

苑牧馬處結莢長寸許子大如脂麻狀似羊腎帶綠色

者名白蒺藜俗呼沙苑蒺藜 藥譜蒺藜有旁通屈人

止行休羽諸名皆因其傷人也

蘆荻

總論 爾雅蒹葭蘆葦也 埤雅幼曰蒹葭長曰葦葦
荏小而葦大 談苑江東蘆賤而荻貴退灘之地先一
年生者蘆也明年生者荻也

蘆 埤雅葦即今之蘆一名葭葭者葦之未秀者也

漢書註葭蘆也草其筒中白皮至薄者 爾雅註江東

呼蘆筍為蘆葦葦之類其初生者皆名蘆 葦芳譜蘆

芽解河豚毒 西京雜記葭蘆之未解葉者謂之紫蘆

本草綱目蘆葉抱莖生無枝花白作穗似茅花根似

竹其節疎

埤雅爾雅云葦醜芳言其華皆有芳秀經

風輒吹揚如雪其聚於地如絮也 說文芳葦花也

范至能詩注元夕吳中俗以葦莖分合為卜名葦姑

搜神記朽葦化菴

埤雅舊云蘆灰缺而月暈移詭者

謂取蘆草灰隨牖下月光中令圓畫缺其一面則月暈

亦缺於上

清異錄好事君子號蘆為蕭寒郡假節侯

拾遺記蓬萊山有葭紅色可編為席溫柔如蜀毳

宣室志晉陽以北地寒而少竹故居人多種葦成林所

以代南方之竹也

荻 埤雅荻即今之荻一名兼兼者荻之未秀者也

說文荻之初生一曰亂一曰雛 夏小正荻未秀為荻

爾雅荻亂也注似葦而小實中江東呼為鳥蔞 爾

雅釋言荻雛也郭注荻草色似雛在青白之間 詩疏

亂或謂之荻至秋堅成則謂之荻其初生三月中其心

挺出其下本大如箸上銳而細揚州人謂之馬尾 淮

南子蒹苗類絮而不可為絮

蒹同

詩疏蒹水草也堅

實牛食之令牛肥強 陸游入蜀記陽山磯岸傍荻花
如雪僧彥威少時曾用此絮裝衣珣禪師見而嗔曰汝
少年輒求溫暖如此豈學道者耶退而問堂中百人有
荻花衣者纔三四皆年七十餘矣威愧恐亟除去 酉
陽雜俎仙藥有青津碧荻

茅

周易拔茅連茹註茅根名茹 詩豳風晝爾於茅 禹
貢荊州包匭菁茅 禮郊特牲縮酌用茅 天官甸師

祭祀供蕭茅 爾雅賴杜茅 爾雅藎牡茅邢疏茅之

不實者 埤雅茅體柔而理直又潔白故先王用之以

藉亦以縮酒 毛詩注茅之始生曰萋柔而白也 本

草白茅根名地筋一名土筋蘇頌曰春生芽布地如針

俗謂之茅針亦可噉 格物論茅叢生根如相連葉長

三四尺生荒野間野人刈以覆屋莖有毛刺者曰菁茅

史記封禪書管仲說桓公曰古之封禪江淮間一茅

三脊所以為藉也 拾遺記背明之國有焦茅高五丈

燃之成灰以水灌之復成茅也謂之靈茅 吳錄地理

志桂陽郴縣有青茅可染布零陵有香茅任土貢之

郊祀志注麻陽苞茅山茅生三脊孟康曰零茅揚雄曰

瑀茅 本草李時珍曰白茅俗呼絲茅其根甚長白軟

如筋而有節乾之夜視有光故腐則變為螢火黃茅似

菅古名黃菅 南方草木狀芒茅枯時瘴疫大作交廣

皆爾土人呼曰黃茅瘴 說文菅茅也 埤雅野菅茅

屬也其華白故一名白華 詩疏菅似茅而滑澤無毛

根下五寸中有白粉者柔韌宜為索溫及曝尤善也
爾雅疏草似茅者一名孟一名狼尾今人以之覆屋

蓬

爾雅齧彫蓬薦黍蓬邢疏說文云蓬蒿也草之不理者
也種類非一故有齧彫蓬薦黍蓬月令云藜莠蓬蒿並
興是也家語蓬生麻中不扶自直埤雅其葉散生
末大於本故遇風輒拔而飛詩經注蓬華如柳絮聚
而飛如亂髮商子今夫飛蓬飄風而行千里乘風之

勢也 淮南子見飛蓬轉而知為車 博物志師曠曰
歲欲流流草先生流草謂蓬也 西京雜記宮中正月
上辰出池邊盥濯食蓬餌以祓邪 三輔錄張仲蔚所
居蓬蒿没人 拾遺記條陽山出神蓬如蒿長十丈周
初國人獻之以為宮柱所謂蒿宮也

蒿

爾雅繁之醜秋為蒿 晏子蒿草之高者也 爾雅繁
皤蒿郭註即白蒿邢疏白蒿葉似艾粗於青蒿葉上有

白毛粗澀俗呼蓬蒿 詩疏皤蒿一名游胡北海人謂之旁勃 神仙服食經旁勃白蒿也白兔食之壽八百
年 爾雅蒿藋邢疏青蒿也荆楚間謂蒿為藋郭璞云
今人呼青蒿香中炙啖者為藋是也 埤雅青蒿蒿背
之太白者陝西綏銀之間有青蒿在蒿叢中迥然青色
土人謂之香蒿至深秋餘蒿並黃此蒿猶青 本草草
蒿一名方漬即青蒿一名狽蒿 詩疏蕭荻今所謂荻
蒿者是也即牛尾蒿 爾雅疏牛尾蒿似白蒿白葉莖

粗科生多者數十莖可作燭有香氣埤雅云即蕭也

爾雅蔚牡蒿邢疏蔚即蒿之雄無子者故曰牡蒿一名

馬新蒿

本草馬新蒿一名馬先蒿一名馬矢蒿

先乃矢字

之訛馬新又馬先之訛也

食物本草牡蒿三四月生苗葉扁有禿

岐秋開細黃花結實內子微細不可見

爾雅莪羅邢

疏莪一名蘿郭璞云今莪蒿也亦曰蘆蒿陸璣云一名

蘿蒿生澤田漸洳之處葉似邪蒿而細科生三月中莖

可生食又可蒸香美味頗似萋蒿埤雅又名角蒿 本

草角蒿似白蒿花如瞿麥紅赤可愛 正字通斜蒿葉
紋皆斜故名似青蒿 北史邢峙為博士授太子經廚
人進食有斜蒿峙命去之曰此菜有不正之名非殿下
所食 詩疏萎蒿葉似艾白色長數寸高丈餘好生水
邊及澤中正月根芽生旁莖正白生食之香而脆美其
葉又可蒸為茹 本草黃花蒿一名臭蒿一名草蒿
桂海虞衡志大蒿容梧道中久無霜雪處年深滋長大
者可作屋柱小亦中肩輿之杠

艾

爾雅艾冰臺邢疏艾一名冰臺 崔寔月令三月可採
艾 彙苑艾可攻百病以蘄州者為佳蘄艾葉厚而綿
多本地所有者葉薄而綿少 博物志師曠曰歲欲疫
病草先生病草艾也 埤雅醫用艾灸一灼謂之一壯
者以壯人為法其言若干壯謂壯人當依此數老幼羸
弱量力減之 博物志削冰令圓舉以向日以艾承其
影則得火積艾草三年後燒津液下流成鉛錫 容齋

隨筆艾難著力入白茯苓三五片同碾即時可作細末
漢武內傳西王母曰神仙次藥有靈叢艾 武當記
太和山中有千年艾葉長寸餘無尖極香氣與艾同揉
之即碎不類艾葉成茸也 鼠璞艾葉療一切鬼氣
荆楚歲時記五月五日雞未鳴時採艾見似人處攪而
取之用灸有驗今人以艾為虎形或剪綵為小虎粘艾
葉以戴之

莞

說文莞草可以為席 爾雅葍鼠莞郭註纖細似龍鬚
可以為席蜀中出好者 南史齊王智深免官家貧嘗
掘莞根食之

蒲

爾雅莞苻離其上萬郭註今西方人呼蒲為莞蒲蒿謂
其頭臺首也今江東謂之苻離西方亦名蒲中莖為蒿
用之為蓆 說文蒲似藿可以為蓆 埤雅蒲水草也
似莞而編有脊生於水厓柔滑而溫 格物論蒲草叢

生人多種於田間莖長者可六七尺三脊無葉如薤二
三月生苗八九月收可為席 大雅維筍及蒲箋蒲深
蒲也疏深蒲謂蒲弱入水深醢人注云深蒲蒲始生水
中是也 東方朔傳注莞夫離也今謂之蔥蒲 本草
香草一名甘蒲夏抽莖叢生花抱莖端如武士杵俗呼
蒲槌亦曰蒲萼花中蕊屑若金粉開時取之曰蒲黃能
益氣力 山海經孟子之山其上多蒲 續述征記烏
當沉湖中有九十臺皆生結蒲云秦始皇遊此臺結蒲

繫馬自此蒲生則結 漢書路溫舒牧羊取澤中蒲截
以為牒編用寫書 秦記苻洪之先居武都家生蒲長
五丈狀如竹咸異之謂之蒲家因氏焉後改姓苻 留
青日札契丹有蒲頻水叢生一莖葉如柳長不盈尋丈
用以作箭不矯揉而堅 毛詩義疏傳曰董澤之蒲今
人以其蘢為矢

苔

總論 古今注苔或青或紫一名綠蘚一名圓蘚一名

綠錢 述異記苔謂之澤葵又名重錢南人呼為垢草
廣博物志青膚苔也 南粵志苔名品藻一名品落
以落形如品也

地苔 本草綱目百蕊草是瓦松生地下者 清異錄
苔一名地錢一名綠衣元寶王彥章葺園亭壘壇種花
急欲苔蘚少助野意而經年不生顧弟子曰巨耐這綠
拗兒 格物論苔生於地之陰濕處初生其處漸青成
暈斑斑點點久則堆積漸厚又久則微有根葉又能傍

緣樹木階砌磚瓦柱礎而上空室無人行則生紫苔

石苔 本草苔在石上曰石濡一名烏韭李時珍云烏

韭是瓦松生石上者 耕桑偶記石崇砌上就苔蘚刻

百花飾以金玉曰壺中之景不過如是 羣芳譜欲石

上生苔以芟泥馬糞和勻塗潤濕處不久即生 遊名

山志石簣山緣崖而上高百許丈悉生青苔 拾遺記

岱輿山北有玉梁千丈駕玄流之上紫苔覆漫味甘而

柔滑食者千歲不飢

樹苔 香譜艾納松上莓苔也 三峩山記山高多風

木不能長枝悉下垂古苔如亂髮髻挂木上垂至地

水苔 淮南子窮谷之汙生青苔 莊子得水土之際

則為鼃蟻之衣注青苔也 說文苔水衣也 爾雅漳

石衣郭註水苔也一名石髮江東人食之 風土記石

髮水苔也青綠色皆生於石 庶物異名疏陟釐乃水

中粗苔可作紙青綠色李時珍曰陟釐生水中石上生

者蒙茸如髮有水污在石而生者纏牽如絲綿之狀俗

名水綿 拾遺記晉武帝時祖梁國獻蔓金苔色如金
投於水中蔓延波瀾之上光出照日皆如火生水上也
宮人有幸者以金苔賜之置漆盤中照耀滿室名曰夜
明苔著衣襟則如火光

屋苔 本草苔在屋上曰屋遊又曰瓦松 崔融賦序

瓦松者產於屋雷之上俗以其形似松生必依瓦故曰
瓦松 酉陽雜俎博邪在屋曰昔邪在牆曰垣衣廣志
謂之蘭香生於久屋之瓦魏明帝好之命長安西載其

瓦於洛陽以覆屋 夢溪筆談段成式以昔邪為瓦松
不知昔邪乃是垣衣瓦松自名昨葉 清異錄有門生
離合瓦松為四字曰一元木公

薊

通志薊曰虎薊曰刺薊曰山牛蒡爾雅繫狗毒即薊也
又有一種小薊曰猫薊曰青刺薊北方曰千針草以其
莖葉多刺故也花如紅藍花而青紫色多生於燕地故
曰薊門 正字通大薊高三四尺葉皺名虎薊俗名牛

溺刺一名牛鍼草小薊無刺高一尺葉不皺一名猫薊
爾雅註术一名山薊又馬薊似薊而肥又鉤芡似薊

莎

爾雅臺夫湏疏夫湏莎草也 爾雅翼莎草可為衣以

禦雨今人謂之蓑衣名曰夫湏蓋匹夫所湏也 廣雅

地毛莎藟也 本草莎一名蒿一名侯莎一名水香稜

一名雀頭香生田野間其根如棗核者謂之香附子

晏殊庭莎記是草耐水旱樂蔓延雖拔心隕葉弗之絕

也 春明退朝錄河中府有綠莎廳

藍

毛詩終朝采藍 禮月令仲夏之月令民無刈藍以染

注藍色青青者赤之母刈之傷時氣 說文藍染草也

漢官儀小藍曰蓂 通志藍有三種蓂藍染綠大藍

如芥染碧槐藍如槐染青三藍皆可為澱 羣芳譜藍

有數種大藍葉如萵苣而肥厚微白小藍莖赤葉綠而

小槐藍葉如槐皆可作靛又有蓂花葉梗莖皆似蓂

別有芥藍一名擘藍葉色如藍芥屬也葉可擘食故北方謂之擘藍葉大於菘根大於芥臺苗大於白芥子大於蔓菁三月花四月實葉可作菹又可作靛染帛勝福青 爾雅疏歲一名馬藍今大葉冬藍為靛者是也

爾雅翼菘藍其汁抨為靛堪染青 本草吳藍長莖如蒿而花白吳人種之木藍長莖如決明與諸藍不同而作靛則一別有甘藍可食 崔寔月令榆莢落時可種藍五月可刈藍六月可種冬藍大藍 續漢書楊震植

藍以供食母 趙岐藍賦序余道經陳畱土人皆以種
藍染紺為業藍田彌望黍稷不植

紅藍

通雅紅藍即紅花北方有焉支山山多紅藍北人采其
花染緋取英鮮者為胭脂 羣芳譜紅藍一名黃藍花
色紅黃葉似藍有刺春生苗嫩時可食葢乃有花花下
作棗花出棗上棗中結實白顆如小豆其花可染真紅
及作胭脂為女人唇妝晚花色更鮮明耐久不黧勝春

種者其子搗碎煎汁入醋和蔬食極肥美又可為車脂及燭 博物志張騫得其種於西域 留青日札李益

詩藍葉鬱重重藍花石榴色是藍花本紅也紅藍花中

國人謂之紅花 本草番紅花一名洎夫藍出回回地

面

茱

爾雅茱王芻郭註茱蓐也今呼鷓鴣腳莎 本草註蓋草

葉似竹細薄莖圓小生平澤溪澗側可以染黃洗瘡效

俗名菉蓐草

菹

爾雅茅蒐如蓐邢疏今染絳菹也一名如蓐一名茅蒐
草木疏菹草一名地血齊人謂之茜徐州人謂之牛
蔓今圃人或作畦種時故貨殖傳云卮茜千石亦比千
乘之家 卉譜一名血見愁一名過山龍一名風車草
十二月生苗蔓延數尺方莖中空有筋外有細刺數寸
一節每節五葉八月開花結實如小椒中有細子說

文茅蒐人血所生故字以草从鬼 劉禹錫和州刺史
壁記歲貢茅蒐七千兩

麻

詩東門之池可以漚麻 禮內則女子執麻枲學女事

以供衣服 羣芳譜大麻一名火麻一名好麻一名漢

麻剝其皮績之可為布其稽白而有稜細者可為燭心

說文檉麻枲屬 爾雅翼檉暗高四五尺葉似苧而

薄或作頊 爾雅枲麻檉枲實注檉麻子也 齊民要

術既放勃拔去雄者未放先拔則不成子勃謂麻花也
麻有雌雄雄者名臬雌者名苴 北史鈕因性至孝周
武成中廬於父母墓側生麻一株高丈許圍之合拱枝
葉鬱茂冬夏恒青 洞冥記石脉出晡東國細如絲可
繩萬斤生石裏破石而後得此脉縈緒如麻紵也名曰
石麻亦可為布

苧

說文苧草可為繩 詩疏苧亦麻也科生數十莖宿根

藏土中至春自生不歲種也荆揚之間一歲三刈剝取皮以竹刮其表得裏韌如筋者煮之用緝布謂之徽紵今南越紵布皆用此麻 羣芳譜每歲可割三鐮諺曰頭苧見秧二苧見糠三苧見霜頭苧粗勁堪為粗布二苧稍柔細惟三苧甚佳堪為細布苧根忌見星月即變野苧 本草取苧根和米粉為餅可禦飢李時珍曰苧家苧也又有山苧野苧也紫苧葉面紫白苧葉面青背皆白根皆可刮洗煮食

葛

說文絺綌草也

左傳葛藟猶能庇其本根

地官掌

葛註凡葛征不止為絺綌用

埤雅葛性柔韌蔓生可

衣瓜葛皆蔓延相及故親屬之綿遠者取譬瓜葛

清

異錄葛為世用花入藥根叅果藤筋備紉織土生而具

三材亦草中之白眉

爾雅註龍葛似葛蔓生有節江

東呼龍尾亦名虎葛

洞冥記紫鬚葛於地下生花入

地十丈乃得此葛其根倒出亦名金虎鬚草

本草蘇

恭曰葛雖除毒根入土五六寸已上者名葛脰服之令人吐以有微毒也葛穀即其實也 正字通就葛亦葛類葉黃而圓故一名黃環其實名狼跋子 爾雅翼食葛非為絺綌者其花藤可醒酒一名鹿藿一名黃斤一名雞齊

藿

本草藿荷葉似初生甘蕉根似薑芽性好陰在木下生者尤美 古今注藿荷似菑苴而白菑苴色紫花生根

中花未敗時可食久置則爛 正字通楊慎丹鉛錄泥

急就章注謂藁荷即甘露甘露即芭蕉不知芭苴非即藁荷也 荆楚歲時記仲冬鹽藏藁荷用備冬儲 搜

神記外姊夫蔣士先中蠱其家密以藁荷置於席下忽大笑曰蠱我者張小小也乃收小小已亡走自此解蠱藥用之多驗

商陸

爾雅遂蕩馬尾也 廣雅馬尾商陸也 邢疏一名白

昌一名當陸

本草綱目遂蕩音逐蕩言能逐蕩水氣

治十種水病

說文蕩草枝枝相值葉葉相當 本草

別名蕩江東為當陸一名夜呼

茵陳

方書茵陳一名蒼蒿

廣雅一名因塵 陳藏器本草

茵陳類蒿經冬不死更因舊苗而生故名因陳 羣芳

譜生泰山及丘陵坡岸上近道亦生不如泰山者佳吳

中所用乃石香薷也

正字通或因本草稱茵陳蒿白

兔食之仙誤以白蒿當之今階州以白蒿為茵陳蒿不知茵陳似青蒿而背白雖有蒿名實非皤蒿也

葇蓉

本草一名天仙子又名橫唐行唐苗莖高二三尺葉似地黃闊二三指四月開花紫色莖葉有白毛五月結實殼如小石榴房中子細扁青白色如粟粒 張仲景金匱要略水葇蓉葉圓而光有毒誤食令人狂亂甘草汁解之 史記淳于意傳淄川王美人懷子不乳意飲以

葭藶藥一撮以酒飲旋乳 本草服之令人狂浪放宕
故名葭藶

酸漿草

爾雅葭藶寒漿邢疏葭一名寒漿郭云即今酸漿草江東
呼曰苦葭 本草酸漿一名醋漿一名燈籠草 茹草
編酸漿草即蟠蜞青 夢溪筆談苦耽即本草酸漿也
庶物異名疏河西番界中酸漿有盈丈者 羣芳譜
酸漿草一名苦耽即今所稱紅姑娘也所在有之惟川

陝者最大苗如天茄子高三四尺葉嫩時可食四五月
開小白花結薄青殼熟則紅黃色殼中實大如龍眼生
青熟則深紅 徐一夔元故宮記棕毛殿前有野果名
紅姑娘外垂絳囊中含赤子如珠甜酸可食 茹草編

敗醬草一名苦職 正字通苦職即酸漿之小者亦呼

為小苦耽 李時珍曰龍葵酸漿一類二種酸漿苦職

一種二物大者為酸漿小者為苦職 古今注苦職子

有裹形如皮弁始生青熟則赤裹有實圓如珠亦隨裹

青赤長安兒童呼為洛神珠又曰王母珠又曰皮弁草

龍鬚草

本草龍鬚一名龍鬚生山谷濕地狀如鳧茈苗直上無
枝葉莖端開小穗花結細實吳人栽時以為席一名龍
珠一名懸莞一名方賓一名王母簪一名草續斷即龍
鬚草也陶弘景謂龍鬚似龍鬚但多節分為二物非是
古今注龍鬚草一名縉雲草 山海經賈超之山多
龍修郭註龍鬚也似莞而細生石穴中莖倒垂可為席

格致鏡原卷六十八

欽定四庫全書

格致鏡原卷六十九

大學士陳元龍撰

草類二

水草

萍 禮記季春之月萍始生 淮南子海閭生屈龍屈

龍生容華容華生蓂蓂生萍藻萍藻生浮草凡浮生不

根拔者生於萍藻 說文萍萍也無根浮水而生常與

水平故名 爾雅注萍江東謂之藻 字說以無定性

隨風漂流故名藻 本草水萍一名水華一名水蘊生
池澤水上葉圓小一莖一葉根入水 淮南萬畢術老
血變為萍 世說楊花入水化為浮萍 埤雅萍浮於
流水則不生於止水則一夕生九子故名九子萍 呂
氏春秋菜之美者崑崙之萍 雲林異景志太原少尹
樊千里載數車浮萍入池為鴨作茵褥 家語童謠曰
楚王渡江得萍實大如斗赤如日剖而食之甜如蜜
青宮故事宋文帝為宜都王臨川人獻萍實六子大者

如升小者如鶴卵圓而赤

蘋 爾雅萍萍其大者蘋 陳藏器本草蘋一名芣苢

晏元獻曰蘋葉圓而小花始生俗呼為水照以其類
鑑也其花五出黃細而香盛於中夏無飄零 通雅靡

蘋田字草也 本草四葉合成一葉如田字形者蘋也

俗呼破銅錢一名四葉菜生水中者白蘋生田中者青

蘋也 酉陽雜俎太原晉祠冬有水底蘋不死食之甚

美 吳興志白蘋洲在苕溪東南乃越女采蘋處

荇

爾雅荇荇同接余其葉荇郭註叢生水中央圓在莖

端長短隨水深淺江東人食之

陸璣詩疏接余白莖

葉紫赤色正圓莖寸餘浮在水上根在水底與水深淺
等大如釵股上青下白鬻其白莖以苦酒浸之脆美可
食 顏氏家訓荇黃花色如蓴可用為祭祀之俎 埤

雅荇亦名鳧葵舊說藻華白荇華黃 羣芳譜荇菜一

名荇絲菜一名擘一名屏風一名屬子菜一名金蓮菜

形似蓴而微尖 農田餘話荇菜爛煮之其味如蜜名

曰荇酥 留青日札池州人呼荇為荇公鬚言其亂生如鬚也 洞冥記旦露池有連錢荇荇如錢文 庶物異名疏武夷君傳細蕤紫荇也

藻 毛詩注沈曰蘋浮曰藻 詩疏藻水草也生水底有二種其一種葉如雞蘇莖大如箸長四五尺其一種莖大如釵股葉如蓬蒿謂之聚藻二種皆可食 博物志師曠曰歲欲惡惡草先生惡草水藻也 埤雅藻水草之有文者生乎水下而不能出水之上似槐葉而運

生生淺水中與萍雜至秋則紫今俗謂之馬藻亦謂之
紫藻 羣芳譜水藻葉長二三寸兩兩相對生即馬藻
也聚藻葉細如絲節節連生即水藻也俗名鰓草又名
牛尾藻 述異記靈池方四百步中有倒枝藻一名水
網藻枝橫倒水中長九尺餘如結網野鴨秋鳧及鷗鷺
來翔水上入此草中皆不得出如繒網也 酉陽雜俎

仙藥有神吾黃藻

爾雅荇牛藻同郭註江東呼為馬

藻 顏氏家訓荇音威郭璞註三蒼云蘊藻之類也細

葉蓬茸一節長數寸細茸如絲員繞可愛長者二三十節今人寸斷五色絲橫著綠股間繩之以象若草用以飾物即名為著張敞名之曰縵 南康記魚朝恩宅有洞房四壁安琉璃板中貯江水及蘋藻諸色魚蝦號魚藻洞

海藻 爾雅蘓海藻注如水藻而大似髮黑色生海中 南越志海藻一名海苔或曰海羅生研石上 陳藏器本草爾雅所謂綸似綸組似組東海有之正謂二藻

也善治瘤癭藻有二種生淺水如短馬尾名馬尾藻生
深海中葉如水藻而大名大葉藻俗名海菜可為菹又
海帶出東海水中石上似海藻而粗柔韌而長人切食
之車若水脚氣集海藻所謂大菜也

香草

杜若 爾雅杜若土鹵注似葵而香 本草圖經杜若
一名杜蘅苗似山薑根似旋覆花黃赤子赤色大如棘
子 山海經天帝之山有草焉狀如葵臭如薜蘿名曰

杜蘅可以走馬郭註杜蘅帶之令人便馬馬亦善走

博物志一名土杏 本草懷即杜蘅也又名蘅薇香

廣雅楚蘅杜蘅也 事物原始今杜蘅生近地諸山之

陰下濕之處根葉都似細辛無二惟氣小異以形似馬

蹄故又名馬蹄香戴之能香人衣體 通志草木略唐

貞觀中敕下度支求杜若省郎以謝玄暉詩云芳洲采

杜若乃責坊州貢之當時以為嗤笑

蘼蕪 管子五沃之土生蘼蕪 本草經蘼蕪一名薇

蕪一名蘄 埤雅蘄蕪一名江蘄似蛇床而香楚謂之
蘄晉謂之蘄齊謂之蘄 淮南子亂人者若蛇床之與
蘄蕪 博物志芎藭苗為江蘄根曰蘄蕪 爾雅蘄蘄
蘄蕪邢疏郭云葉小如姜狀者言如姜蕪之狀也 樊
光曰蘄本一名蘄蕪根名蘄芷 廣志蘄蕪香草魏武
帝以藏衣中

揭車 爾雅揭車芑輿注揭車香草也 廣志揭車味
辛生彭城高數尺重葉白花 海藥本草揭車生海南

山谷凡諸樹蟲蛀者煎此香冷淋之即辟也又辟惡氣
薰衣佳

薜荔 楚辭披薜荔兮帶女蘿註薜荔無根緣物而生
本草一名絡石在石曰石鱗在地曰地錦繞叢木曰
長春藤又曰扶芳藤又曰龍鱗薜荔 正字通緣木蔓
生依巖石者如織根入石罅土中大二三寸結實上銳
下平外青中瓢經霜則瓢紅而甘可食 丹鉛錄今京
師人家假山上種巴山虎是也

芸 禮月令仲冬之月芸始生註香草也 三蒼解詁

芸似邪蒿香可食 說文芸似苜蓿一名芸蒿 邵氏

見聞後錄芸置書帙中無蠹置席下去蚤蟲葉類豌豆

作小叢遇秋則葉上微白如粉汙南人謂之七里香遠

在數十步外已聞香自春至秋不歇 成公綏芸賦莖

類秋竹枝象青松 晉宮閣名太極殿前芸香四畦式

乾殿前芸香八畦 杜陽編芸草出於闐國甚香潔白

如玉入土不汚 正字通外國之芸為木汁今中國楓

汁俗亦名芸香以其似外國之芸而名也辟蠹之芸則
七里香也 王氏談錄庭砌下有草如苜蓿尤香乃牛
芸也

鬱 說文鬱芳草也 埤雅鬱草若蘭十葉為貫百二

十貫為築煮以合鬯所以灌也舊云遠方鬱人所貢鬱
今鬱林郡也 本草其香十二葉為百草之英二三月
有華狀如紅藍四五月間採花即香也 彙苑鬱金香
草也釀之以降神又香可佩宮嬪服之禱衿

皂 埤雅皂草名先鄭小毛所謂皂香草也築而煮之
為皂因謂之皂傳云皂草生庭又曰德至於地則蓂莢
起拒皂出知皂為草矣舊說芬芳條暢故謂之皂禮以
鬱合皂

霸薰胡繩 夏樹芳詞林海錯霸薰香草名見范子計
然胡繩亦香草名見楚詞

奇草

抱朴子朱草狀如小桑長纔三四尺枝葉皆赤莖如珊

瑚生名山嶺石之下刻之汁流如血以玉及八石金銀
投其中立可丸為泥以金投之名曰金漿以玉投之名
曰玉漿服之皆長生也 白虎通朱草赤色可以染絳
別成黼黻之服列為尊卑之差 瑞應圖朱草百草之
精也王者德無所不通則生 尚書中候堯德清平比
隆伏羲故朱草生郊 大戴明堂篇朱草日生一葉至
十五日生十五葉十六日一葉落終而復始 晉書地
生朱草天必見黃星 化書朱草可以剖人 瑞應圖

威蕤瑞草也王者有禮則生於殿前一曰威綏 禮斗
威儀君乘木而王其政昇平則福草生 五嶽圖恒山
有太玄泉神草十九種 白虎通王者使賢不肖位不
相踰則平露生庭狀如蓋政平則正不平則傾王者繼
嗣平明則賓連生於戶闕達生於房連累相承象繼嗣
也 通歷堯時有蓂莢草十五日以前生一葉十五日
以後落一葉若月小盡則一葉厭而不落 說楷蓂莢
實曰翠莢 博物志堯時有屈軼草

軼一作佞人入朝則

屈而指之一名指佞草 白虎通萑莆瑞草也王者孝

德至則萑莆生 廣博物志萑莆一名倚扇堯時生廚

中能生風食物寒而不臭 雲牕私志無畏草一名乾

先草出壽麻國戰國時仙人陸興進十莖於魏安釐王

如姬以贈無忌無忌至趙畀朱亥以助其威後朱亥入

秦秦王命亥入柙中與虎居亥處之晏如虎亦相視如

其類也王慙而遣之 述異記漢武帝時西方日支國

獻活人草三莖有人死者將草覆面則活之矣 洞冥

記北極有明莖草夜如金燈折枝為炬照見鬼神之物
仙人甯封常服此草於夜暝時轉見腹光通外亦名洞
冥草武帝令對此草為泥以塗雲明之館夜坐不加燈
燭亦名照魅草以藉足履水不沉又武帝時末多國獻
五味草初生味甘花時味酸食之使人不眠一名却睡
草波弋國獻神精香草亦名荃薜一名春蕪一根百條
其皮如絲可為布堅密如冰紈也握之一片滿宮皆香
婦人帶之彌月芬馥又有鴈葵草色丹葉長四寸赤松

子餌之又夢草似蒲色紅晝縮入地夜則出武帝思李
夫人之容不可得東方朔乃獻一枝帝懷之夜果夢夫
人因名懷夢草又東方朔曰臣種吉雲草於九景山二
千歲一花明年應生臣走往刈之以飼馬帝許之朔平
旦而去至暮而返背負數束其葉似麥而金色 廣異
記謝元卿至東岳夫人所居有異草葉如芭蕉花正黃
色光可以鑑曰此金光草也食之化形靈元壽與天齊
開元遺事興慶池南岸有草數叢葉細心勁醉者過

其旁摘草嗅之立醒名醒醉草 杜陽編順宗時拘彌

國貢變畫草類芭蕉可長三尺而一莖千葉樹之則百

步內昏黑如夜 杜陽編元載造芸暉堂芸暉香草也

出于閩國香潔如玉入土不朽為屑以塗壁故名其堂

又李輔國家夏則設迎涼草其色類碧幹若苦竹葉細

如杉挂之窓戶間涼風自至 述異記桂林有睡草見

之則令人睡一名醉草亦名嬾婦草出南海又寡草特

生而不叢 要覽芑葛西天草名體性柔軟引蔓旁布

馨香遠聞不肯日光喻出家人 奚囊橘袖幅羅草出

賈超山李少君取絳唇之血丹虹之涎靈龜之膏阿紫
之丹搗幅羅草和成香煙如水紋蛟龍百怪出沒其間

三輔黃圖瀛洲有草名曰芸苗狀如菖蒲食葉則醉
餌根則醒 拾遺記樂浪之東背明國有虹草枝長一

丈葉如車輪根大如穀花似朝虹之色齊桓公植於庭
以表霸者之瑞宵明草夜視如列燭晝則無光黃蘗草
映日如火其堅韌若金聞遐草服者耳聰香如桂莖如

蘭岱輿山有遙香草其花如丹光耀日月葉如忘憂花
葉俱香扇馥數里其子如薏中實甘香食之體如草香
又潺乘草高五丈葉色紺莖如金形如半月之勢亦曰
半月草質溫柔可為布為席 述異記瑤琨去玉門九
萬里有碧草如麥割之以釀酒則味如醇酎秦趙間有
相思草狀如石竹而節節相續一名斷腸草又名愁婦
草亦名孀草人呼為寡婦莎錫義山生微蘅草有風不
偃無風獨搖北方胡地生蓆萁草一名塞路楚中有宮

人草狀如金盞花色紅翠俗說楚靈王時宮人數千皆
多愁曠死者葬之墓上生此拾遺記方丈山有草名
濡蘄葉色如紺莖色如漆細軟可紫海人織以為席薦
卷之不盈一手舒之則坐萬國之賓莎蘿為經莎羅草
細如髮一莖百尋柔軟香滑羣仙以為龍鵠之轡員嶠
有草名芸蓬色白如雪一枝二丈夜視有白光可以為
杖岱輿山有草名莽煌葉圓如荷去之十步炙人衣則
焦刈之為席方冬彌溫以枝相摩則火出矣福地記

武當縣石堦山西北角大松樹下生救窮草冬夏不枯
日食三寸絕穀不飢陶先生謂之西岳佐命是也 典
要壽榮草出少室金山丘下服之不老餌玉長生草一
名通天價值千金 十洲記祖洲在東海中上有不死
之草生瓊田中一名養神芝草形如菰苗長三四尺秦
始皇時多枉死者有鳥銜此草覆死人面當時起坐而
自活也 尸子赤縣洲為崑崙之墟生玉紅草食其一
實醉臥三百歲 物類志護門草出常山取置戶下或

有過其門者草必叱之一名神護草一名百靈草 酉
陽雜俎舞草出雅州獨莖三葉葉如決明一葉在莖端
兩葉居莖之半相對人或近之則歌抵掌謳曲則搖動
如舞 益州草木記雅州出虞美人草唱虞美人曲則
應拍而舞 賈氏談錄虞美人草狀如雞冠花葉相對
廣志南海有草叢生如藤蔓土人視其節以占一歲
之風每一節則一風無節則無風名曰知風草 興化
府志候潮草葉間有莢如榆莢潮至即開退即合 癸

辛雜志起死回生草一名押不盧出回回國以少許磨酒飲人則通身麻痺而死雖加以刀斧亦所不知至三日別以少藥投之即活御苑中亦儲之一統志柳州產苴草如茅高二三尺食之多壽故又名不死草夏月采置几筵中則蚊蠅不近物亦不腐述異記東海有島曰龍駒川產龍葛草馬食之日行千里西壑傳南荒有地日草日中三足鳥欲下食此草羲和馭之以手掩鳥目蓋鳥食此草則美悶不能動矣括地圖太極

山有華芝草采而服之可以通萬里之語 雜俎蜜草

出北天竺國蔓生大葉秋冬不死被霜露遂成蜜如塞

上蓬鹽

留青日札撒馬兒罕小草叢生葉細如藍秋

露凝其上味如蜜可熬為飴蓋甘露也 花木考羊刺

草上生蜜名刺蜜味甚佳南平城羊刺無葉其蜜色明

白而味甘鹽城羊刺葉大其蜜色青而味薄 彙苑含

生草出鞞鞞國婦人難產口中含之立產 類山相憐

草南丹山出或有所屬密以此草擲之著身不脫必相

從不舍也 花木考西域有草名九枝秀若聖人降生
則此草生於潔淨之地又左行草使人無情范陽長貢
又獨搖草帶之令夫婦相愛生嶺南頭如彈子尾若鳥
尾兩片開合見人自動 洞冥記合歡草狀如著一株
百莖書則衆條扶疎夜則合為一莖萬不遺一謂之神
草 道簫玄鹿草生於名山人迹不到處烹而食之壽
二千歲 番禺雜記草名火河火不能燒若河隔火故
名 彙苑芳採草如麻出奔盧國燃之以為燈有白鳳

黑龍來戲焉

洞冥記躡空草又名掌中芥葉如松取

子置掌中吹之而生一吹長一尺至三尺止然後移於地不經掌中吹者不生食之能空中孤立故名 王氏

談錄北方有鐵脚草採取陰乾投之沸湯中頃之葉

舒卷如生

奚囊摘袖女香草婦女佩之則香聞數里

男子佩之則臭昔海上有丈夫拾得此草嫌其臭棄之有女子拾之香甚其人欲奪之逐女子不及乃止呂氏春秋海上有逐臭之夫疑即此事 物類相感志透山

根其為草葉類蕪菁可以點化黃金謂之仙藥一人採之就鐵鍋中煮變為金以獻蜀王問耆老曰透山根也

雜草

博物志天姥曰太陽之草名曰黃精餌之可以長生

抱朴子黃精服其花勝實服其實勝根有黃精處必有黃雲時起庶物異名疏黃精一名重樓一名菟竹一

名雞格一名救窮一名鹿竹本草名地髓詞林海錯

青精一名南天燭又曰墨飯草以其可染黑飯也道家

謂之青精飯 爾雅註疏江東有鬼目草一名苻莖似
葛葉圓而毛子如耳瑞赤色叢生雞腸草一名繁縷多
生下濕坑渠之側人家園庭亦有之軒于水草一名蔓
于江東呼為茜柱夫可食之草一名搖車又呼翹搖車
蔓生紫華華翹起搖動故名云蘭葶一名竊衣似片可
食子大如麥兩兩相合有毛著人衣橫目草蔓生一名
結縷俗謂之鼓箒草東海有綸草組草華山有帛草布
草俱因其形似為名 山海經嶧冢有菁蓉草葉如蕙

本如桔梗黑花而不實食之使人無子小華山有葷荔
草狀如烏韭生於石上亦緣木而生食之已心痛熊耳
山有葷葷草狀如蘇而赤華朝歌山瀕水有莽草俱可
毒魚甘棗山有擇草葵本而杏葉黃華而莢實可以已
曹脫扈山有植楮草狀如葵葉而赤華可以已瘋食之
不眯大砮山有牛傷草葉如榆方莖而蒼可以禦兵臯
塗山有無條草狀如藁芡葉似葵而赤背可以毒鼠青
要山有荀草狀如薺而方莖黃花赤實本如藁本服之

美人色休與山有夙條草狀如著赤葉而本叢生可為
簪招搖山有祝餘草狀如韭而青華食之不飢又有莖
草狀如茱白華黑實澤如蓂蘊竹山有黃蘗草狀如檇
葉如麻白華赤實如赭浴之已疥崑崙之丘有蕢草狀
如葵味如蔥食之已勞牛首山有鬼草葉如葵而赤莖
其秀如禾服之不憂陽華山有諸蘂草狀如櫛實如瓜
味酸甘食之已瘡鼓鐘山有焉酸草方莖黃花圓葉而
三成可以為毒也為治姑媯之山帝女死焉化為瑤草其

葉胥成

言葉相重也

其花黃其實如菟絲服之媚於人半石

山有嘉榮草生而秀高丈餘赤葉赤華而不實服之者不畏霆大驄山有蕨草狀如蓍而毛青華白實服之不

天爾雅邢疏芷草一名夫王郭璞云芷草生海邊似

莞蘭今南方越人採以為席

南方草木狀吉利草莖

如金釵股形類石斛根類芍藥交廣里俗多畜蠱毒惟此草解之吳黃武中江夏李侯以罪徙合浦初入境遇毒其奴名吉利者偶得是草與侯服遂解因以吉利為

名又良耀草枝葉如麻黃花白如牛李秋結子如小粟
煨食之解毒功不亞於吉利始有梁耀者得是草因亦
以為名梁轉為良耳出高涼 三齊記鄭玄教學處有
草如薤而細俗謂康成書帶草 拾遺記晉太始十年

浮支國獻望舒草其色紅近望如卷荷遠望如舒荷

物類相感志鹿目草生江南山足下高丈餘葉似常而
長紫花長穗秋中熟如搗投水中魚悉浮出 孔六帖

王式徙安南都護浚濠繞柵外植刺草寇不可冒 酉

陽雜俎劉慄草一名鹿活草宋元嘉中青州劉慄射一
鹿剖五臟以此草塞之蹶然而起慄怪而拔草復倒如
此三度慄錄此草種之主傷折俗呼為劉慄草 鳳翔
退耕傳元和時館閣湯飲待學士者煎麒麟草 五代
史裏潭有息雞草尤美而本大馬食不過一本而飽陽
城淀草軟如茸可藉以寢 述異記懸腸草一名思子
蔓南中呼為離別草太原晉陽以北生屏風草 述異
記麝香草一名紫述香一名紅蘭香一名金桂香出蒼

梧桂林上郡界今吳中有麝香草色似紅藍而甚芳香
酉陽雜俎奈祇草出佛林國苗長三四尺根大如鴨
卵葉似蒜葉中心抽條甚長莖端有花六出紅白色花
心黃赤取其花壓以為油塗身除風氣 拾遺記晉武
帝時後堂生草三株莖黃葉綠若總金抽翠花條薄弱
狀似金盞 謝惠連仙人草贊余之中園有仙人草焉
春穎其苗夏秀其英秋有貞實冬無彫色 廣博物志
舜草今之孝草也歲蕤草一名麗草又名女草江浙呼

為娃草 南方草木狀鶴草一名媚草蔓生其花麴塵
色淺紫蒂葉如柳而短當夏開花形如飛鶴背翅尾足
無所不備出南海上有蟲老蛻為蝶赤黃色女子藏之
謂之媚蝶能致其夫憐愛又肥馬草瀕海郡邑多馬有
草葉類梧桐而厚取以秣馬謂之肥馬草馬頗嗜而食
果肥壯 西京雜記終南山多離合草葉似江離而紅
綠相雜莖皆紫色氣如蘿勒 衡嶽志天堂峰有石室
其中生草兩莖相纏有垂頭如絛俗呼為羅漢絛岩竇

中多生 酉陽雜俎有草蔓生色白花微紅大如栗秦
人呼為野狐絲 博物志海上有節草實如大麥七月
熟歛獲至冬乃訖名曰自然穀 酉陽雜俎三白草初
生不白入夏葉端方白農人候之時田三葉白草畢秀
矣葉似薯蕷 丹鉛續錄按左思吳都賦曰東風扶留
注東風草名玉篇作東風又按齊民要術引廣州記曰
東風華葉似苔莖紫宜肥肉作羹味如酪香氣似馬蘭
困學紀聞莊子楚狂之歌所謂迷陽人多不曉胡明

仲云荆楚有草叢生修條四時發穎春夏之交華亦毓
麗條之腴者大如巨擘剥而食之其味甘美野人呼為
迷陽其膚多刺故曰迷陽迷陽無傷吾行 蜀中方物
記鴛鴦草春晚葉生其稚蘗在葉中兩兩相向如飛鳥
對翔 本草地蜈蚣草生塍野中左蔓延右右蔓延左
葉密對生似蜈蚣形穗甚長俗呼過路蜈蚣其延上樹
者呼飛天蜈蚣根葉並入藥治一切癰腫蜈蚣傷者入
鹽少許搗塗效 留青日札金燈一名無義草葢花葉

不相見也一名獨搖又名離母 太倉志金燈俗呼忽

地笑穿山甚廣重九登高燂若丹霞亦奇草也 鴈山

志金綿草即蟹殼草葉圓如蟹殼節間有紅線長尺許

羣芳譜虎刺葉深綠而潤枝繁細多刺四月開細白

花花落結子紅如丹砂子性堅雖嚴冬厚雪不能敗至

花開時子猶未落產蕭山者不如虎丘者更佳宜種陰

濕處年久綠葉層層如蓋結子紅鮮若綴火齊然 羣

芳譜老少年一名雁來紅初出如莧至秋深腳葉深紫

而頂葉嬌紅其純紅者名老少年紅紫黃綠相兼者名
錦西風又名十樣錦又名錦布衲二種俱狀秋色藝
花譜老少年腳葉紫而頂紅少年老頂黃而葉綠農
圃六書萬年青一名千年藍龍膽草一名陵游花極媚
竹葉蘭一名鈴兒草花似鋼鈴羣芳譜淡竹葉春生
苗細莖綠葉儼如竹一窠數十鬚鬚結子八九月抽莖
結小長穗花可作畫燈青翠砂綠等用根名碎骨子
曲洧鵲聞筆談載淡竹葉謂淡竹對苦竹凡苦竹之外

皆淡竹也新安郡界中自有一種竹葉稍大於常竹枝
莖細高者尺許土人以作熟水極香美可喜方藥所須
悉用之有效豈存中未之見耶 李時珍本草長松草
一名仙茆生古松下根色如薺芫長三五寸味甘微苦
似人蔘 曲洧舊聞長松草產五臺山治大風有殊効
世人所不知也文殊指以示癩僧僧如其所教其患即
愈 爾雅卷施草拔心不死 南越志寧鄉縣草多卷
施江淮間謂之宿莽 正字通宿莽遇冬不死梟耳至

秋早彫二物不同韻會誤合為一爾雅鷦綬郭註小
草有雜色似綬故曰綬草廣雅附支蒲草也通志
通草曰丁翁曰王翁萬年方書亦謂之木通爾雅曰離
南活芄以活芄亦謂之離南今人謂之通草其瓢白可
愛婦人取以為首飾其實曰燕覆子曰烏覆曰桴攄子
曰挈子留青日札王獻迎神歌曰蒲草頭花柳葉裙
今作通草羣芳譜翠雲草性好陰色蒼翠可愛細葉
柔莖重重碎處宛若翠鈿其根遇土即生見日則消栽

於虎刺芭蕉秋海棠下極佳 本草經夏枯草一名夕

句一名乃東 方書羊蹄草秋冬生長夏至死主治禿

瘡陰蝕

王朗與魏太子書臯蘇釋勞

臯蘇草名能釋人之勞

本草鬼針草生池畔方莖葉有極子似釵脚著人衣如

針一名鬼釵 花木考金星草葉上有金星點根中有

黑筋如髮又謂之出髮草俗傳用以浸油塗頭上禿處

則髮生 水經注牧靡草可以解毒鳥多誤食烏喙口

中毒必急飛往牧靡山啄牧靡以解毒 曲洧舊聞新

安郡婺源縣境中產一種草莖葉柔弱引而不長葉類
甘菊葉俗呼蘆今訛為遮食之味苦而有餘甘又呼苦
益菜 本草綱目燈心草一名虎鬚草一名碧玉草生
江南澤地陝西亦有叢生莖圓細而長直吳人蒔之取
瓢為炆以草織席及蓑 中華古今注草有虎鬚者江
東亦織為席曰西王母席 羣芳譜鳳尾草柔莖青色
葉長寸餘附莖對生每邊各七八葉相連本寬以漸而
狹儼如鳳尾喜陰 農圃六書虎耳草一名金絲荷葉

莖間有紅絲繚繞之 羣芳譜虎耳一名石荷葉莖微

赤有細白毛葉如荷蓋大如錢面青背微紅夏開小花
淡紅色生陰濕處 正字通狗尾草苗葉似粟而小穗

黃形似狗尾莖治目痛故又名光明草一名阿羅漢草
即莠也 任士林賦序吉祥草酷似蘭而踈秀人云十

歲一花余見一本紫莖而花莖纔二寸綴花數十似瑞
香而歛小近玩之有香氣 羣芳譜吉祥草叢生不拘
水土石上俱可種色長青花紫蓓結小紅子然不易開

花可登盆以伴孤石靈芝清雅之甚或云花開則家有
吉慶事人以其名佳多喜種之 升菴外集苛小草也
今但知為苛刻之苛藐紫草也今但知為藐然之藐蓋
染草也今但知為忠蓋之蓋 南火醎草葉似邪蒿而
氣香味醎女人國食醎草如禽獸 賢爽編塞北有蚊
母草草懋而蚊變 永嘉記青田縣有草葉似竹可染
碧名為竹青故名其地曰青田 山堂肆考高昌國有
草名白氎繡其花可以為布為巾 本草綱目箬草一

名遼葉李時珍曰似竹而弱故名箛其生踈遼故又謂之遼生南方平澤根莖皆似小竹葉與箛似蘆荻葉面青背淡柔而韌新舊相代四時常青男人取葉作笠女人以襯鞵底庶物異名疏雁膳草名也管子地員篇曰其種鴈膳黑實朱跗

惡草 附草異

本草經鉤吻一名野葛博物志太陰之草名曰鉤吻食之入口立死朝野僉載治葛食之立死有治葛處

即有白藤花能解治葛毒嶺南風俗多為毒藥令奴食
治葛死埋之土中草生正當腹上者食之立死手足額
上生者當日死旁白外者數日死遠者或一月兩月或
一年兩年亦死 閩部疏斷腸草一枝三葉葉大如萹
食之輒死解此毒者先以蜜灌之已復灌羊血吐出可
不死 酉陽雜俎落迴一曰博落迴有大毒生江淮山谷中
莖葉如麻莖中空吹作聲如勃邏迴因名之 談叢滇
中有草名金剛蓼其幹如珊瑚多刺色深碧小民多樹

之門屏間此草性甚毒犯之或至殺人余問滇民植此
何為曰以辟邪耳 賢奕編百粵間有草結實如小毬
俗名顛茄服之則心狂 墨莊漫錄川陝間一種惡草
土人呼為^音其枝葉拂人肌肉即成瘡疤 彙苑
牧麻草大毒風吹其氣所至則數里內稻皆死李淳風
云有汁本清得水則稠見日則濕入陰則乾在夏欲涼
在冬欲溫 花木考獨自草有大毒煎傳箭簇人中之
立死生西南夷中獨莖今夷獠中猶用此藥傳箭簇

正字通羊躑躅毒草也一名黃杜鵑一名老虎花一名
開羊花葉似桃葉花五出蕊瓣皆黃氣味惡有大毒

事物原始地鞭草梗長二三尺節長三寸許如鞭故名
地鞭其草斷節埋土中就節上生梗梗上生葉節下生
根一時不能盡除亦惡草也 彙苑夫娘子草草子甚

細如刺善惹人衣其氣臭惡按南方苗人謂妻曰夫娘
又謂婦人無行者亦曰夫娘蓋言其臭穢善惹人耳南
宋蕭齊尚佛法故法琳云閤內夫娘悉令持戒謂夫人

娘子也

草異 漢書元帝永光二年天雨草葉相糾結如彈丸

續漢書靈帝中平元年東郡陳留濟陽長垣濟陰諸

縣界有草生大如指狀似鳩爵龍蛇鳥獸之形五色各

如其物毛羽頭目足翅皆具或作人形操持弓弩牛馬

萬物之狀 晉書惠帝元康二年巴西郡界草皆生花

結子如麥可食 拾遺記元熙時三株草化為三柳枝

葉似楊

五行志光啓

唐僖宗
年號

元年河中解永樂生草

葉自相繆結如旗旌之狀時人以為旗子草

附藤

爾雅諸慮山臬注今江東呼臬為藤藤似葛而粗大也

廣雅藟藤也

張騫出關志酒杯藤出西域藤大如

臂葉如葛花實如梧桐花堅可以酌酒自有文章映徹

可愛實香美消酒土人提酒至藤下摘花酌酒仍以其

實醒酒

異苑永陽縣有神農窟窟前有五色藤花形

似菱朝紫中綠晡黃暮青夜赤五色迭曜地理志循

州貢五色藤盤

彙苑蔓葉藤葉似葛蔓延於樹可為

醬即漢書所謂蒟醬也忠州出引藤大如指中空可吸

俗用以取酒

酉陽雜俎人子藤安南國有之紅色在

蔓端有刺其子如人狀燒之則集象清異錄終南山

出瓔珞藤軟碧可愛葉甚小有子累累然纏固其上有

如瓔珞

裴氏廣州記土人伐船為業隨樹所在就以

成槽而去水遠山有膏藤津汁軟滑無比以此導地牽

之如流雖五六丈船數人便運

南州異物志杜芳藤

形不能自立根本緣繞他木作房藤連結如羅網相罥
然後皮理連合鬱成林所託樹既死然後扶踈六七丈
也 南方草木狀紫藤葉細長莖如竹根極堅實重重
有皮花白子黑置酒中久不腐敗其莖截置烟炙中經
時成紫者可以降神榼藤依樹蔓生如通草藤子紫黑
色一名象豆三年方熟其殼貯藥不壞解諸藥毒生南
海 臨海異物志鍾藤附樹作根軟弱須緣樹而作樹
即纏死且有惡汗尤令速朽藤盛成樹大者數圍又菝

藤圍數寸可以為杖箴以縛船及為席勝於竹也 博
物志剡溪藤可造紙 顧微廣州記水藤人山行渴則
斷取汁飲之治人體有損絕沫則長髮去地一丈斷之
輒更生根至地永不死 藝文類聚野聚藤緣樹木二
月花色仍連著實五六月熟大如羹甌其味甜酢出蒼
梧蘭子藤生緣樹木正二月花青色四五月熟實如梨
赤如雄雞冠生食之味淡泊出交趾合浦菽藤生金封
山俚人往往賣之其色正赤出興古浮沉藤生子大如

瓠正月花色仍連著實十月臘月熟色赤生食之甜
酢出交趾九真 齊民要術簡子藤生緣樹木實如梨
赤如雞冠核如魚鱗取生食之淡泊甘苦 南史齊解
叔謙母病間空中人語曰得丁公藤為酒便差即訪醫
至宜都山一老人曰此丁公藤也取歸醫母即愈 花
木考大藤峽相傳有藤流而生長數百尺斷之汁出水
為之赤 花木續考狗頸藤俗呼魚藤覆地而生取其
根槌爛可以藥魚 留青日札新興縣斷續藤人山行

渴則取其汁而飲之愛州蒟醬人家多種蔓生子長大
謂苗為浮留藤 困學紀聞策扶老以流憩扶老藤名
以為杖也見蔡順傳注 太平清話天台藤可斲為杖
然有數種有含春藤石南藤清風藤耆婆藤天壽根藤
本草地龍藤生天目山繞樹盤屈如龍黃藤生嶺南
狀如防己土人常服之根如牡丹骨柔皮厚肉白凌冬
不彫甘藤一名感藤狀如雞卵大汁甘如蜜含水藤一
名大瓠藤狀似葛葉如枸杞斷之水出可止渴省藤一

名赤藤皮赤大如指可縛物又有龍手牛領鬼膊斑珠
息王萬一曼遊金稜含春獨用祁婆諸名 紺珠天統
綻在樹上絲絡我眉山名為普賢袈裟曼遊藤寄生大
樹春花色紫葉如柳又名沉瀉藤 杜陽雜編萬根藤
一子而生萬根枝葉皆碧鉤連盤屈蔭一畝其花類芍
藥而藥色殷紅細如絲髮可長五六寸一孕之內不啻
千莖亦謂之絳心藤 本草千金藤有數種生北地者
根大如指色似漆生南土者黃赤如細辛鉤藤狀如葡

葛藤而有鉤紫色倒掛藤生深山有逆刺如懸鉤倒挂
於樹金銀藤一名左纏藤其花長瓣垂髮黃白相間而
藤左纏故名

格致鏡原卷六十九